

## **ASO GAFUA, 20 SETEMA 2021**

*Na toe amatalia Taulumaga a le Fono Aoaofaitulafono i le itula e 1:58 i le afiafi.*

*Na toe faaauau felafolafoaiga i luga o le Faitauga Faalua o le Tulafono Tau Faaofi o le Faatatauina o tupe 2021/2022.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofaitulafono.

E toe faafeiloai atu i le paia o le Palemene, i lenei vaega o le aoauli i le toe faaauau ai o Taulumaga. E talitonu ua sao i alo le taligasua i le paia o le Palemene.

Lau Afioga i le Palemia, le Sui Palemia ma le mamalu o le Kapeneta, afiio foi Minisita Lagolago. E tainane foi lea Itu o le Maota, lau Afioga i le Taitai o le Itu Agai ma le mamalu o sui usufono uma o le Palemene. Ia tatou faafetai i le Atua ua maua foi se isi malosi tatou te faaauaua ai a tatou Galuega.

E faataatiaese Taulumaga a le Fono Aoaofaitulafono, o lo o saunoa le sui usufono mo Aleipata Itupa i luga.

O lea ua avatu fautuaga i lau Afioga i le sui mamalu, ia o lo o tele lava o tatou avanoa aua le auiliiliina o le Tala o le Tupe. E 15 minute ma avanoa e lua (2).

O le mea lea ou te tapa le sui mamalu mo le faaauauina o lau saunoaga.

**Afioga FUAAVA SULUIMALO AMATAGA:** Ua faafetai tele i lau Afioga i le Fofoga Fetalai. E talitonu o lea ua matu i fau le palega auau, ua sao foi i alo le taligasua e pei ona feagai ai ma le mamalu o le Palemene. E avatu ai le agaga faafetai i le Afioga i le Fofoga Fetalai ma le Ofisa, i le tapenaga o le taumafataga a sui mamalu.

Ae muamua ona ou faamalulu atu i lau Afioga i le Nofoa, pe a fai ua laa ese ma tulaga e pei ona e saunoa mai ai. Ae ua tele foi ina uma se manatu o Aleipata Itupa i Luga.

Vagana si mea lea ua misi atu i tulaga o Galuega tetele ma Atinae, lau Afioga Olo le alofa, si ou nuu lea o Ulutogia, silasila i le auala fou foi lea i uta. E alu atu i ina le aualagalue e agai i uta. A o le va o lena ma aualatele lea e i tai, o la lava e vaoa. E pe na o se 700 mita le tele o si vaega lea. A

maua lava ni nai mea nuti o totoe i le muli o le ola, alofa ane i si vaega lea, e faamanaia sia vaega o le aualagalua o si ou nuu o Ulutogia.

O lea e matau atu o lea faatoa afio mai le afioga i le Minisita o Leoleo, le afioga ia Faualo. Leaga e faigata o lupefaalele foi o lenei itumalo. I le afioga foi ia Aulaumea o le falefia o alii, o lea ua uma ona faaleo atu, o lena e te silafia le manaoga i tua i si o tatou nuu i tua i Lalomanu e i ai le outpost lea. E faaatoatoa ane i lau silasila se mea ua faapena se motugaafa ua tuuina atu.

Ona faaiu atu ai lea o se faamatalaga, o na i saafiafiga na ma manaoga na o si ou itumalo. Ae o le toe upu a le usugafono, ia faamanuia le Atua i lau Afioga i le Palemia, aemaise foi o le sui Palemia ma le mamalu o le Kapeneta, le paia foi i Minisita Lagolago. Ia maua la outou tofa faatamalii, a ia faasilisili lava le Atua ma Lona finagalo e taitaina ai a outou afioga aua le sa o Samoa a taeao.

Ia faamanuia foi le Atua i le Taitai ma le sui Taitai aemaise foi o sui mamalu o lenei Vaega, o lea o lo o fai pea la matou galuega, o le tuualalo ma agaia la tatou Faigamalo. O upu lava o le atunuu, e logo lava le tuli i le tātā, e tupu foi le faamoemoe o le taugologolo.

Ia alofagia foi e le Atua lau Afioga i le Fofoga Fetalai, o lau afioga o lo o feagai ma le faatonufofoga o le Maota, ina ia faapena ona seemalie ma faataunuuina uma fuafuaga o le Fonousu a Samoa.

O se leo lena ma le agaga faaaloalo, ia manuia le Fonousu a Samoa, toega o totoe i lenei aso. Soifua ma ia manuia.

*Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Aleipata Itupa i Luga.*

**FOFOGA FETALAI:** Ua faamalo faafetai le saunoa faatamalii. E faafetai foi i le tofa. Ia e alualu malie lava le saunoaga ae ogaoga lava na i mea o lo o aumai ai, le feau o lo o taumolimoli mai ai. O le mea lea faafetai le saunoa malo le tofa, o lea foi ua faafofoga ma le totoa le Faigamalo, aemaise foi le paia o le Maota, aemaise foi le faafogafoga mai o le matou itumalo. Aua galuega fai ma le agai i luma o le itumalo ma le tautuaina o le itumalo. Malo faafetai malo saunoa. Faafetai tanoa.

O le taimi lenei i se tasi o sui usufono. Ua matau atu o lea ua tulai mai se tasi foi o sui tuai o le Palemene, le Afioga ia Peseta Vaifou Tevaga mai Faasaleleaga Nu 5. E tasi lea sui matua o le Maota. Ou te talitonu foi, o le a le toe taupou a o lea o le a agai sao foi i le Tala o le tupe.

O le taimi lenei o le saunoaga a le sui mamalu.

**Afioga PESETA VAIFOU TEVAGAENA (Faasaleleaga Nu 5):** E faatalofa atu i lau afioga i le Fofoga Fetalai, po o lau Afioga foi o lo o taitaia lo tatou Maota.

E avea foi lenei avanoa e faafeiloai atu ai ma faatalofa atu i lau afioga i le Palemia, lau Afioga i le Sao Faapito.

E faapea foi ona faafeiloai atu i lau Afioga i le sui Palemia, lau afioga Tuala. E faapea foi le paia maualuga o le aiga Kapeneta. E faafeiloai atu foi ia outou Afioga i Minisita Lagolago, e faapena foi i le mamalu o lena itu o le Malo.

Liliu mai i lenei Itu o le vai, ou te faafeiloai atu ma faatalofa atu i lau Afioga i le Taitai, le sui Taitai, faapea foi i le mamalu o lenei itu o le tatou Malu.

E faatalofa atu foi i lo lua vaa seelua failautusi o le Maota, ae a le tapuaiga i Ofisa sili o Pulega o Matagaluega a lo tatou Malo.

Lau Afioga i le Fofoga Fetalai, o paia na o paia faalupe na o le Maota i le taimi lenei. O paia o le atunuu, o paia lava mai le vavau seia oo i le faavavau. O Tama ma o latou Aiga, o Aiga ma a latou Tama, Tumua ma Pule, Aiga i le Tai ma le Vaa o Fonoti.

E faatalofa atu i le paia maualuga o si o tatou Atunuu, le afio o lau Afioga i Le Ao mamalu o lo tatou Malo ma lau masiofo. Afio lau Afioga o le Sui o le Fono o Sui Tofia ma si ou faletua. Afio foi lau Afioga i le Faamasino sili, faapea lau Afioga i le Peresetene o Faamasinoga o Fanua ma Suafa, alii ma tamaitai faamasino. Ae a le maave eseese o le aufaigaluega a le Matagaluega o Faamasinoga o Fanua ma Suafa. E le gata i Mulinuu nei, ae faapea foi si o matou motu i Salafai.

Lau Afioga i le Fofoga Fetalai, e fia oo atu sa matou faafetai, ma se matou faafeiloai atu i le tapuaiga a auauna tofofi a le Atua, o lo o nonomanu aua le faafalelemalu, aua le manuia o Samoa mo a taeao. O le agaga maualuga o lenei aso lau Afioga i le Fofoga Fetalai, o le agaga o le faafetai.

Lo tatou itumalo, ia tapuai mai, atonu e i ai se taimi, ona ou oo atu lea e molimoli sau faafetai. Ae tapuai maia o le a se upu a o le a se sao o la outou sui usufono sa outou filifilia. Ia tuu i luma o le Atua la outou tapuaiga.

Lau Afioga i le Fofoga Fetalai, o moomooga o le po ma fiafiaga o lou nei sui usufono, o lea ua seei se tasi o le sui o le Faasaleleaga, a o se mitamita foi lea i lou nei sui usufono. A fai e te silasila mai i lenei Itu o le Malu, ia masalo na o au o lea ua tu atu i lenei Itu. A o le matou tatalo i lau Afioga i le Fofoga Fetalai, e ao lava ona avatu se matou tala. Matou te faamanuia atu ai i lau afioga le Fofoga Fetalai. A o le i avatu lava se manatu o lenei itumalo. Faafetai, faafetai i le Atua, o lea ua e seei i le Nofoa, aua a tatou liliu i taeao o le Talalelei. O lau afioga, o lau afioga lava le uluai taeao.

O moomooga ia o le aso, lea ua e afio, o le matou tatalo, ia faatalalelei le finagalo o le Atua i lau Nofoaiga. O le tatalo lena a siui o Faasaleleaga o lenei itumalo. Ia utupupu le utu a lau afioga, foai e le Atua le lototele ia te oe e faatino ai ou tiute. O le mea lea, o se faamanuiaga lena a si ou nei itumalo i lau afioga.

Ina ua faalogologo o le a tapena le Fonousu a le Atunuu, sa tuu i luma o le Atua, aumai Lona finagalo, ina ia maua ai se manatu o lenei itumalo, e lagolagosua atu ai i le galuega a lau afioga aemaise foi o le la itu o le Malo.

Ona manatu lea, o lea ua i o matou luma lau meaalofa taua, i le taimi e uma ai le faatautoga, e te foaia le Tusi Paia i sui mamalu uma o le Maota.

Ua e silasila mai lau afioga i le Fofoga Fetalai, e pau lea o le auupega, e tautala ai le sui mamalu o le Maota lenei, o manatu faale-Atua. A fai foi e te faafogafoga mai, pe i luga pe i lalo sau faamatalaga, tofa malie lau Afioga i le Fofoga Fealai, o upu lava mai le Atua. Fai mai le Isaia e 40 f 31, fai mai, “A o e e faatalitali ia Ieova, e faafouina lo latou malosi, latou te siiie apaau e pei o aeto, latou te tamomoe ae le vaivai, latou te savavali ae le tigaina.”

Lau Afioga i le Fofoga Fetalai, a tatou toe mafaufau i le uiga o lenei mau e aumai e le Isaia.

Ona ou mafaufau lea i mea sa tuanai, ioe, ua uma ona taoto le Maota, le autofa. Ioe ia faagalogalo mea ua tuanai. Ua tatou maua foi le loto faamagalo, o le agaga faafetai lena. Ae fai mai le tusi a Faaaliga 1 f 19, na faatonu ai e le Atua Lana agelu i le lagi, sau e alu, sau e alu. Tau atu ia Ioane, ia ona faia se tusi e tusia ai mea sa vaai i ai, mea sa tutupu ma mea ua tutupu ma mea o le a tutupu.

O lona uiga lau Afioga i le Fofoga Fetalai, o a lava mea sa tutupu, o lea ua tatou maua le loto faamagalo. Ae le mafai ona tuua, leaga o lea ua fetalai le Atua ia Ioane, tusi mea sa tutupu, tusi mea ua tutupu, tusi ma mea o le a tutupu. O lona uiga, so o se mea e tupu i le lalolagi nei, e ese le taua lau Afioga i le Fofoga Fetalai. Aua o mea e tusi i lalo nei, e tusi foi i luga.

O a mea tatou te taumafai e soalaupule i lenei Maota. Lau Afioga o le Maota lenei o le Maota o le atunuu, o le Maota o le Talalelei, o le Maota e teu ai le tofa ma le faautautaga. A o le Maota foi e lufilufi ai le tamaoaiga o Samoa.

Ina ua logo mai le Fonousu i le aso 14, sa ou sii lava le faafetai i le Atua. Sa ou mafaufau o se aso taua lea o le lalolagi. E masalo a outou silasila ane i diary na e i luma o outou, o upu na e tusia ai i le aso 14 o Tesema, Holy Cross Day. O le Koluse, o le Koluse o le Satauro lea. O le aso lea tatou te faamanatu ai, ioe, tatou te faamagalo ai, le va o le uso i le uso, lea e ala ai ona faataua e le aukerisiano uma o le lalolagi, le aso lea o le aso 14 o Setema.

O lea sa ou manatu ai, ai o le a mafai ona matou oo mai, seia o tatou fale ma tatou feiloai, aepeitai ua le tau lau o le faamoemoe. E ui i lea, e le afaina, o le measili o lea lava ou te tusitusia lava mea nei. Aua o lea ua uma ona faatonu e le Atua ia Ioane, tusi aua o le molimau ola lea o mea e tutupu, o molimau ola ia o mea e tutupu. O a lava ni mea sa o tatou folafolaina, e tusi uma lava. O lea foi sa ou faalogologo lau afioga le Fofoga Fetalai, ma matau pea le Tala o le tupe. Ia faafetai, faafetai i lau Afioga i le Minisita. O lea sa ou faalogologo ma le totoa, ma e le o se tala avane ai.

Ua oo lava foi i lou itumalo, ua le maua sau malologa, vili mai, vili mai, e tasi lava le mea la e mananao ai, o le miliona.

O lea ou te fia fesili atu i lau Afioga i le Minisita o tupe, o fea e aumai ai le miliona lea? E aumai ia outou taga, po o taga a le Malo? Ioe, o le ala lena na ala ai ona ou fia fesili. O lea ua oo foi lava i la outou Itu, o lea foi e fesili lava i le miliona lea. O lea foi ou te fesili atu ai, e tufa la afea? Leaga ua faatiga taliga i si ou itumalo le valaau mai. E tiga ona ou fai atu, se ou te le i folafolaina atu, ioe, ou te le i folafolaina atu ni miliona.

O le mea lea lau Afioga i le Minisita o tupe, e manaomia se faamalamalama o le miliona lea. E leaga e tau loa le miliona, se leaga o le miliona lea ua ou masofasofa ai. Ioe, ua matuai ou masofa i le upu lea tau o le miliona. O le mea la lea, e tasi lena vaega muamua o lau faafesili i lau Afioga i le Minisita.

Lona lua, o le penisione. Aua o lea ou te faitau atu i le ulutala o lau tala o le tupe, o lea e te saunoa mai, toe tapoupou. O le a le uiga o lea upu, a lea ua tu le fale, o lea ua e silasila atu i pousima ia ua tu, ua uma. A o lea ou te vaai atu i le penisione lea sa ou faalogo lava o faapea mai. O le a saini e tagata matutua le penisione tai \$300, ae saini faalua i le masina. O le mea lea ou te fia fesili atu lava i lau Afioga i le Minisita o tupe, aua o lea ou te vaai atu, e le o sau se \$300, na o le \$200 lea, a o le \$200 sa faatino ma folafola e le Faigamalo....

**Susuga Hon Laauli Leuatea Polataivao Fosi:** Lau Afioga i le Fofoga Fetalai mo se avanoa.

**FOFOGA FETALAI:** Onosai mai le sui mamalu, se i avatu le faauilavea a le Malo ona o lea ua e oo i miliona ma tai...

Lau Afioga i le Minisita o Galuega.

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eseese):** Ou te fia fesili atu lava i le sui usufono, po o ai na faalogo ai i lea mea e tala faalua i le masina ia le \$300 lea, a e le o se miliona foi e avatu e tufatufa, o le miliona na avatu e faataamilomilo mai atinae. Na o lou alu atu soo ia te au, ou te fiu e faamalamalama oe, ae e te le malamalama lava.

**Afioga PESETA VAIFOU TEVAGAENA:** Lau Afioga i le Fofoga Fetalai, o lea ou te fesili i le Minisita o tupe. A o lea lava foi e i i lau telefoni le saunoaga a si ou uso ia Fepuleai ma Lagaaia, e tusa a fea. O le a le uiga o lea mea, e tufa a fea, ia o lena, o le tali lena, e tufa a fea? O le ala lena e ala ai ona ou fai atu, se e fia maua foi e lou itumalo se miliona.

**Tofa Hon Olo Fiti Afoa Vaai:** Lau Afioga i le Fofoga Fetalai, o lea la ua ou maua le mea e te agai atu ai ia te au. O lona uiga e te alu atu ma tapue a ta talanoaga, o lona uiga o oe o se spy, e le o oe la o sau uo. Aua a la ne i e toe tagi mai i sau galuega e fai.

**FOFOGA FETALAI:** Ia taatia a lua talanoaga faauso lena ae aumai manino lou finagalo i le Palemene.

**Afioga PESETA VAIFOU TEVAGAENA:** Sa ou faapea o le Afioga ia Faumuina le leaga lea e i ai. A o lea ua ou iloa nei o Olo e sili ona leaga. E leaga a ou mafaufau lava i le aso na matou faalala ai i fafo. O lea ou te iloa na e manao lava matou te o mai. A o le Minisita lea o Galuega, na ou maua le tala, o ia lava na faasa leoleo, e o e taofi.

**FOFOGA FETALAI:** E faamalulu atu i le sui mamalu, e i ai lava le faaeteetega o lafoga. E faamalulu atu foi i le sui mamalu, ua uma ona tatou aloa lea ogasami, ua tatou fefaamagaloi. Aua tatou te iloa lava, e leai e faapena lo tatou nonofo ia maua pea lo tatou nonofo fealofani. E talitonu foi, o a mea ua tuanai, ia faagalo o lau afioga i le sui mamalu ia tatou agai i luma e maua ai se manuia o tatou itumalo.

Tulai mai le Afioga i le Minisita o Faatoaga ma Faigafaiva.

**Susuga Hon Laauli Leuatea Polataivao Fosi:** E leai se agaga e faalavelavea le saunoaga a le sui mamalu. Ae ua ou taofi e faaataata a lafoga a o la e molimau le atunuu. O le mea lea e tataua ona faasao, e le o le auala lea na momoli ai le feau o le matou taumafaiga o le faiga palota. E leai, leai se taimi e tasi sa o matou taua ai le mea lea, e tala faalua le penisione i le masina ae tai \$300. O le mea lena e tataua ona manino lelei i le faafofoga a le Atunuu.

O lona lua, o lea foi tatou te pisa i le mea lea o le miliona. O lea sa matou fai atu. O le Faiga Faavae, o le tupe lea o le a faaagaga mo itumalo e atinae sao lava i ai itumalo. E ave le avanoa i itumalo e faaagaga ai le miliona a le Malo, e fai ai a na atinae, mo le taimi muamua. Ae o le a i ai se taimi ona faamalamalama lea e le Afioga i le Minisita o tupe, leaga tatou te talanoa, a o la e matau le Atunuu.

O le agaga foi na ala ai ona saunoa sui usufono o lenei Itu i le mataupu lea. E leaga o le taimi lena, tou te le i afifio mai. O le matou talitonuga o le measili lava le toe laga e lenei itu mataupu ia, leaga o lea sa talai i fafo. E le tupu, e leai se miliona e pepelo. O le agaga lena o lea o le a faamalamalama atu, e tupu ma e taunuu le miliona lena. E leaga o la e faalogologo mai o tatou itumalo ne i ave sese ina, ona tupu ai lea o le mea fesili, fesili. Ae lelei lava le faamalamalama atu i totonu o le Maota leaga e felele solo uaea

mosooi ma alu i fafo. E ese upu na saunoa i ai le Malo, ae ese le taufaasese la e alu i fafo.

O le agaga lena lau Afioga i le Fofoga Fetalai, ua ou manatu ua tatau ona faasao.

**FOFOGA FETALAI:** Pe maua se avano lau afioga. O le a se mea o .....

**Afioga Fepuleai Faasavalu Faimata Sua (Salega 1):** E faafetai i lau Afioga i le Fofoga Fetalai, e talu ai o lea ua maua e le sui mamalu lou igoa, e tusa ai foi ma le tai miliona. E faamalulu atu i le sui usufono, ona ua e taua lou igoa i lou fesiligia o le miliona. E leaga o au ou te faiaoga lakapi, a oo ina timu ua faaoga le isi plan, ae a la ua faaoga loa le plan lea. O lea sa ou fesiligia ia le tai miliona, o lea ua e faafofoga mai. E le o se isi itu, ou te le i lauga faa-FAST. Na ou lauga o au o le sui usufono o Salega Nu1, e faaali le finagalo o lou itumalo.

**FOFOGA FETALAI:** Ou te iloa o lea ua manino lava lea vaega. Ou te alitonu lava, o lo o manino saunoaga a le Minisita o tupe faapea le lagolago o le aiga Kapeneta. O oe lea sa e saunoa i Tusi Paia. Ua ta lagona lava le Agaga o le Alii ina ua e saunoa i le Tusi Paia. Aemaise lava ua e taua le Perofeta o Isaia, aemaise foi o le agelu ia Ioane. E te manatua foi e lau Afioga i le sui mamalu le malaga a Mose ma le nuu o le Atua. O le upu lava lea, fai mai le Atua tatou o i le nuu o Kanana, o lo o tafe ai le suasusu ma le meli. O lena e te silafia na oo lava i Kanana e leai se suasusu ma se meli, leaga e le o le finagalo lena o le Atua. O le finagalo o le Atua, ina ia ola le agaga faaoga le mafaufau ina ia atiae le nuu.

E talitonu foi o le faamoemoe foi lena o le Minisita o tupe, e le o le ....a o le loto ia ola le agaga faatasi ai ma mea uma. O le mea lea, e faamanatu atu faapena o oe o le tagata o le Tusi Paia, o lea ua e faasoa mai. Atonu aua e te popole, atonu e i ai se taimi ona saunoa manino lea o le Minisita o Tupe.

**Afioga PESETA VAIFOU TEVAGAENA:** Lau Afioga i le Fofoga Fetalai,

**FOFOGA FETALAI:** Ia tulai maia lau Afioga i le Taitai o le Itu Agai.

**Susuga Hon Tuilaepa Fatialofa Auaelua Sailele Malielegaoi:** Ou te tulai atu e tau faafilemu lea mataupu ona e laga mai e tagata ia i matou. O le ala foi lena e faigata ona nofonono ai ia sui usufono o lenei Itu. E pei foi ona saunoa mai le sui usufono o le la itu, o lea e lagalaga mai e itumalo. A fai la e laga mai e itumalo, o itumalo ia sa fai ai road shows nei. Ma o lea e tulituliloa mai e latou ia upu sa fai. E pei o le tulaga lena. Ae o le tulaga foi i le laga o lenei mataupu, ia a mea foi ua e nofo ma toe tufa mai fua nei Tusi

Paia? Ia lea la toe tala'u atu upu la e i totonu o le Tusi paia. Ae manuia le tatou Fono.

**FOFOGA FETALAI:** Malo faafetai. Ia, tulai maia, se o oe le isi sui usufono matua o le Palemene e faalagolago foi i lau tofa. Ia saunoa maia. Aua ta te toe talanoa i le Tusi Paia ma le ula o le Maota ia taua.

**Afioga PESETA VAIFOU TEVAGAENA:** Ia, o le a ou see ese ma lea vaega. Ioe. Leaga e tumu lava le agaga i le ava ma le faaaloalo i lau Afioga i le Fofoga Fetalai.

Lau Afioga i le Minisita o Tupe, aua ne i tetena i lou finagalo se manatu. O le taua o manatu nei e avatu i lau Afioga, e fau malosi ai lau Tala o le Tupe. Ioe. Ae maumau e pe a na i ai lava nisi tai miliona se i tufa ma nai o matou itumalo. Ia ua uma, o le a ou le toe agai i le tai miliona lau Afioga i le Fofoga Fetalai, ua faamalieina foi lenei sui usufono. Ia ona ou manatu lea lau Afioga i le Fofoga Fetalai, se i ou agai atu i a outou Afioga i Minisita o le Kapeneta. Ioe. Ona ou te talitonu o lea ua uma ona e saunoa o lea e maua le isi tai 15 minute. Ia e usitai lava lenei sui usufono po o lenei Nofoa i le faatonuga a lau Afioga.

Lau Afioga i le Palemia, ia, atonu ou te le iloa po o galo i lau Afioga lau talosaga i le Paeaiga na tea atu a o e afio mai i le Minisita o le Siosiomaga i le taligalu o lenei itumalo ma si ou nuu i Puapua, ona o lou nuu lenei ma le talosaga lenei lau Afioga, ua uma ona tuuina atu i le tatou Matagaluega ata o le taligalu. O le fanua lea e talosaga atu ai i le taligalu lea, lea sa i ai le malumalu o le Atua, le Ekalesia Mamona. Peitai na osofia e le galu ma mafua ai ona sii agai i le vaomatua si o matou malumalu. Ou te talitonu masalo po o le fa lenei o talosaga o faataatia atu le talosaga a si o matou nuu. Ia, tau lava ina toe faamanatu atu, aua o lea ua matau atu i lau Afioga i le Palemia, o lea o lo o e tauavea pea lenei Matagaluega. O lea e tatalo atu ai, se i e toe silasila ane lau Afioga i le Palemia.

Lau Afioga i le Minisita o Faatoaga, atonu e le o toe po se lilo i le tulaga pagatia o lo o feagai ma le lalolagi ma le atunuu i lenei vaitau, aemaise fua o faatoaga. E fai foi o le afaina o le soifua ma le ola i le faamai ua i ai nei, a o lea foi ua maua mai i atunuu i fafo, ua leai se tatou talo o toe auina atu i fafo. O lea e avatu ai se faafesili i lau Afioga, ona ou te talitonu o lea e i ai isi fesoasoani i mea tau fua o faatoaga po o nisi foi o fualaaui aina, lea e maua mai le tala i Niu Sila o lo o moomia. Afai ua faaletonu le tatou talo, lea e tau mai o lo o moomia tele le laupele, moomia le laupele i le taimi lenei, moomia foi le manioka i le taimi lenei. O lea foi o lo o ia te au le lipoti o le aofaiga o container ia mai Toga o le manioka. A o le mea moni lava e uma ane le masina ua leai se manioka i totonu o faleoloa. E moni lava e le o taumamafa foi le mamalu o le tatou atunuu i lea foi mataiai pe laitiiti foi, a o le tele o



atumotu o le Pasefika o lo o aumau i Niu Sila ma Ausetalia lea o lo o latou taumamafa ma faaaoga lea foi ituaiiga taumafa.

O le mea lea, ia toe silasila ifo lau Afioga. Afai ua i ai ni faaletonu i nisi foi o fua o faatoaga i lenei vaitau ona o le faamai, faafetai foi o lea ua maua o lo o malosi lava le esi lea e sau mai Salafai. Ou te le iloa la i Tumua nei po o le a se silasila a lau Afioga, ae o lo o moomia tele lava lea foi mataiai a le atunuu i Niu Sila ma Ausetalia. Toe silasila ane. E pei lava o le vaitau i le faafitauli lea e tupu i le talo lea e auina atu i Niu Sila, ona ua manao tele le tatou Matagaluega i le tau lea ina ia lava se polofiti. Ae silasila foi lau Afioga, e tele lava ina muamua alu le talo lea mai Fiti. O lona uiga e oo mai i le taimi o le tatou talo ua afaina. Ai seivagana ua toe silasila i le tau, se tau talafeagai ina ia mafai ona alualu pea lea foi alagatupe ma fua o faatoaga.

O le mea lea, e avatu ai pea se tuualalo i lau Afioga i le Minisita i lea tulaga.

**FOFOGA FETALAI:** Toe lua minute o le sui usufono.

**Afioga PESETA VAIFOU TEVAGAENA:** Ia, lau Afioga i le Minisita mo Pisinisi ma Alamanuia lau Afioga Faumuina, faamalo faafetai, ioe. Aua o lea ou te matau atu o lau Afioga lava le Minisita laitiiti lea ou te vaavaai atu i ai. A o oe foi le Minisita e te le faalogo lava i se isi, e te le faalogo lava i se isi, a o lea pei o le a e seetia i le malu o le tai taeao ia Olo lena e i ou talaane. O lau tatalo i lau Afioga, aumai le tatou vaalele, ioe, aumai le tatou vaalele. E ala ona ou fai atu e aumai le tatou vaalele, ou te le o fai atu o le itu lenei. Ua e vaai mai i le malolosi o le mea lea e i ai? Ioe. Ae ou te alofa atu i le itu lena, o lo o outou moomia ni fomai i fafo. Ne i te i ua i ai se mea e tupu i ina ae leai se vaalele, leai se vaalele. O le ala foi lena ua masani lava le itu lenei i le savavali, savavali, pe savalivali nei toe foi i o i Petesa, toe savalivali nei toe foi i o i Petesa. E galo ia outou, o le faamalositino lena na aumai e le Atua. Ua outou vaai mai, ua matou uliuli, ioe. Pe tou te vaavaai atu lava iinei i le Fono o matou nofonofo i lalo o le ulu lale, aua ne i galo, e faapena le nofonofo i lalo o le satauro. O lea lava e tusi uma a mea ia. Ioe. O se aso ona faamanatu lea o mea sa outou faia, ioe, ioe.

Ia, o se talosaga lena i lau Afioga, ioe. Faumuina, o lena ua ou tatalo atu. Pau lava le mea e ala ai ona ou tatalo ua ou popole, ioe, ua ou popole. Ina ne i i ai lava se mea e tupu, ia talofa e, ae aua lava ne i faalogo ia Olo.

Lau Afioga i le Minisita mo Leoleo, ia, talofa, aua foi ne i ita pe a avatu sau tuualalo, leaga e le gata o oe o le Faamasino, ioe, e te faamasinoina agasala a le lalolagi, o solitulafono a le lalolagi, ioe, a o oe foi o le alii loia. Ioe. Se i e vaai ane e vaai mai. Ia, o le tuualalo i lau Afioga, se aua ne i toe aumaia ni pa faapea i luga o le auala ta, ioe. O le mea moni lava ua matou lelavava. E feoloolo le vevela o le la i le vevela o uamea ia e tuu i luga o le auala ta. Ia e alofa mai lau Afioga Faualo, leai, ia e alofa mai foi i le mamalu o le atunuu, o matou foi o isi mamalu o le atunuu.

**FOFOGA FETALAI:** O lea lava ou te faamanatu atu i le Afioga i le sui usufono mamalu o lea lava e fai lava ma e afea atuvasa ua tuanai. A e maua mai o oe o le sui usufono matua o le Palemene, o lea lava ua faaoololomaau atu le Nofoa ia maua ai pea le toamalie ma le filemu, leaga o lea e faafogafoga le mamalu o le atunuu. Ne i meaane ua faapea mai le atunuu o mea ula a le atunuu lea, ae tatou o i mea mamalu, lea ua uma ona fai le faaiuga o lea tulaga, tatou faalelei ma teuteu mea uma, tatou o i luma o le Atua.

O le fesoasoani atu lea i le sui usufono mamalu. Tulai mai lau Afioga i le Palemia.

**Afioga Hon Fiamē Naomi Mataafa:** Lau Afioga i le Fofoga Fetalai, na ona ou fia fesoasoani atu lava i le saunoaga malie a le alii matua o lena Itu o le Malu. O pa uamea ia e te saunoa mai i ai, ai ona tou te le i afifio mai i le aso 24 o Me. E faapena uma lava pa sa fai e leoleo e puipuia ai le saogalemu.

**FOFOGA FETALAI:** Ia, e talitonu o lea ua maea ia mea o lea ua faamalamalama atu tulaga o mea foi sa tutupu. Ae e i ai le manatu lau Afioga i le sui usufono mamalu, ia faagasolo lau saunoaga i nisi itu taua aua le ta itumalo. Ma le agaga faaaloalo.

**Afioga PESETA VAIFOU TEVAGAENA:** Faafetai i lau Afioga i le Fofoga Fetalai. Ia, lau Afioga i le Minisita o Galuega, ona o lea ua vaavaai atu ua le toe umi sou taimi. Atonu e le o po foi se lilo i lau faafogafoga foi i lea Paeaiga ua uma atu, e tatalo atu lava lau Afioga i tulaga pagatia o lea o lo o feagai ma lea foi itulagi i le taimi o galuega i le taeao, aemaise foi taimi o alo ma fanau e molimoli atu ai i aoaoga. O le faafitauli lava lea o lo o feagai ma le itu lea i le agai mai le vaalele i le taulaga, o le poloka lava. O le mea moni lava e pumper to pumper lava taavale, pe 40 i le 50 minute o i luga lava o le auala. Ia, o le tatalo, toe silasila ane pe le mafai ona fai se faiga e faataatia mai se auala e sau mai Lepea agai i tai i Vaitoloa tai, taamilo mai ai i le togatogo agai i magaala ia ua uma ona fuafua e le tatou Malo. O la ua i ai le faataatiaga e lenei Vaega Faaupufai o le auala, ae o le matou tatalo, atonu o le tulaga lena o le a foia ai lenei faafitauli, e moomia lava se isi auala e tua i ai le mamalu o le atunuu, ioe. E tua i ai le mamalu o le atunuu. E pei o si a matou talosaga lena.

Lau Afioga i le Minisita o Aoga, faafetai o lea e matau atu o lo o solosolo lelei pea le tatou Iunivesite, aemaise foi le tatou aoga faa-aperenitisi. Ia se i toe silasila ane, ona e i ai nisi o polokalame e faalaulelei atili ai ma toe siitia lelei ai nisi o aoaoga faa-skills po o tulaga tau faa-matata eseese a alo ma fanau. Toe silasila ane lava i lea tulaga. Ou te iloa e fai foi si taugata, ae ou te talitonu a oo ina atamai le tamaitiiti aoga, e toe pay back lava e le

malamalama ma le atamai o lea tamaititi lea tulaga. Ae lafo atu pea i lau Afioga i le Minisita e toe silasila ane lava, ona e tele vaega faa-matata eseese o lo o moomia lava le toe faaleleia ma toe faaleleia.

Lau Afioga i le Fofoga Fetalai, finagalo malie lau Afioga ia e tele lava nai mataupu sa ou fia oo atu i ai, o lea ua saunoa foi lau Afioga, o le a mafai lava ona matou faafesiligia le Tala o le Tupe le isi 15 minute ne i mea ua uma lou taimi ae se i ou oo atu i si ou itumalo se i momoli foi se faafetai.

Ia, si ou itumalo pele o Faasaleleaga Nu.5, ia si o tatou nuu i Lano, le afio o le paia o Satuala, afio ai le Falefa o lo outou aiga Sa Vui, afio ai le Tamasa, alaalatai ai lau fetalaiga le Matua Fetalai lau fetalaiga Malaerule, alaalatai le nofo i le talaluma faapea le mamalu ia te oe Salemuliaga.

Ou te faatalofa atu foi i si ou nuu pele i Asaga, le paia lava lea o Satuala, afio ai lo outou aiga Sa Matafeo, alaalatai foi le Matua ia te oe Lualuataua, alaalatai lau fetalaiga Leatuavao, le mamalu ia te oe le Salepatu ma le mamalu i le Salemuliaga.

Ia, si ou nuu pele i Puapua, faamalo tapuai, faamalo tatalo. Ou te talitonu, i lenei tolu Paeaiga, o lo o aumaia pea lo outou faatuatuaga ai lava o lo outou silasila mai i taimi uma ou te lauga ai ma ou sii atu le Tusi Paia. Masalo o le mea lea tou te aumai ai lo outou faatuatuaga ia te au. Ioe. O a foi ni mea e taumafai ai e faatino i si o tatou nuu ma le tatou afioaga ma le itumalo, e taumafai lava ae tatou te faamoemoe i le Atua ma Lana foi.

O le mea lea le paia e o Satuala, le paia o lo outou Aiga Faalagilagi, e alaalatai ai oe le pule Sealiimalietoa ma le mamalu i le nofo a ituaiga ia te outou o ou tama ma tina matutua, saoluma, ia faapea le malosi o le tatou nuu. Faamalo tapuai, faamalo tapuai. O lea ua ou seei nei i le Nofoa o le tatou itumalo ona o lo outou faatuatuaina o lou nei tagata e tauaveina le Nofoa o si o tatou itumalo.

O le mea lea, lau Afioga i le Fofoga Fetalai, toe lava o sina au faafetai i nai ou aiga faapea foi tagata sa lagolagoina au i Samoa nei faapea foi le tapuaiga a si ou aiga i atunuu mamao ma si ou itumalo. Afai o outou faafofoga mai le tatou itumalo o aumau i itu e fia o le lalolagi nei i Niu Sila, Amerika, Ausetalia ma isi atunuu, ia oo atu le faamanuia a le Atua ia te outou.

Ona faapea lea o se matou upu lau Afioga i le Palemia, ia faamanuia tele le Atua i lau Afioga, ioe. Ia e maua le lototele e faatino ai le taitaiga o le tatou Malo. Ia lau Afioga i le Sui Palemia ma le mamalu o le Kapeneta faapea foi le mamalu o lenei Maota, ia tuu i luma o le Atua le tatou faamoemoe. O a ni o tatou faaletonu po o le a foi se leo o la outou auauna ua le tautamalii, ia, malu ave i fale i lenei Maota.

O le mea lea lau Afioga i le Fofoga Fetalai, o le matou faamatalaga lea, a o se leo foi lea po o se sao o lenei itumalo i le Tala o le Tupe pei ona faataatia i le Laulau a Fono.

Faamanuia le Atua i lau Afioga i le Fofoga Fetalai aemaise le tapuaiga a Samoa, ia faamanuia foi le Atua i le Taitai o lenei Itu Vaega Faaupufai, lau

Afioga i le Sui Taitai ma le mamalu foi o lenei itu o le malu, tatou foi le viiga i le Atua. Soifua ma ia manuia.

*Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Faasaleleaga Nu.5.*

**FOFOGA FETALAI:** Ua faamalo saunoa, tanoa i lau Afioga Satuala, aua foi le sui usufono mamalu mai Faasaleleaga Nu.5. E pei lava ona matou fai atu, o oe le isi sui usufono matua i totonu o le Palemene. Malo le tofa faatamalii, malo foi le tofa faatupu, ma molimoli mai ai foi ma nai feau. E talitonu lava o lea ua lagonaina foi e le tatou Maota aemaise foi galuega faatino aua si ou itumalo. O le mea lea ua faafetai tautua. Malo foi le tanoa aua foi le tatou tala o le Tupe. E moni lava au o lo o maua foi le avanoa pe a auiliili le tatou Tala o le Tupe, 15 minute pe a i ai nai mea o totoe o le saunoaga. Ae talitonu o lea lava e lagonaina le tofa faalele aua le paia o le itumalo, aemaise foi le paia o le atunuu ma tatou galuega o tatou faatino nei. O le mea lea malo le saunoa. Faafetai.

Ia, o le avanoa lea o se tasi foi o sui usufono. O lea e matau atu o lea ua tulai mai se tasi foi o sui usufono mamalu mai Falelatai ma Samatau, le Afioga ia Lupematasila Galumalemana Togia Tile Leia. Malo faafetai. O lou avanoa lenei e te sausaunoa aua foi le tatou Tala o le Tupe. Ma le agaga faaaloalo.

## SAUNOAGA FAA-TAUPOU

**Afioga LUPEMATASILA GALUMALEMANA TOGIA TILE LEIA (Falelatai ma Samatau):** Faafetai i lau Afioga i le Fofoga Fetalai mo le avanoa o lenei foi itumalo o Falelatai ma Samatau e taumafai atu ai foi se manatu e tusa ai ma le Tala o le Tupe e pei ona opea i le Maota.

E manatu ua i luma o le Atua le viiga ma le faafetai e pei ona e siitia i le taimi ua sola i le taeao. Ia tatou auai e tasi pei ona saunoa lau Afioga i le taeao, o le viiga lava ma le faafetai e le faaitiitia i le Atua. O lea foi ua maea le taliga o le sua i lau Afioga i le Fofoga Fetalai ma le mamalu o lenei Maota, ua maua foi se faasiliga malosia aua le faaauauina o le tatou galuega i lenei aso.

A o laasia e le toeaina o Mose le mauga o le Atua i Horepa e agai atu i le mumu saesae o le laau talatala, ae faateia le toeaina i le fetalai o le Atua, “Mose, Mose, aua e te faalatalata mai iinei, ina to ese ia ou seevae i ou vae, aua ua sa le eleele o lo o e tu ai.” O le fesootaiga a le tagata ma le eleele na fausia ai. A o laeiau le taua a Tuna ma Fata i le lagaina o le toilalo ma le pologa o Samoa ia Toga, fai mai na muamua tofofi laau o le taua i le fanua o Asotofi i Falelatai, sugi ma sausu ma faatonutonu e Ulumasui, o le tama e

itulua, o le tama Falelatai. Na faapea ai upu o lo o lauivilu ai le atunuu, “Aua tou te matamata tutu, a ia outou matamata nonofo aua o lo o maimoa mai Samoa.” A o le mau i le itulagi lea fai mai, “A laasia e le tausala le paepae e agai atu i le lagituaiva o le Tagaloaalagi, e muamua ona faatulou, ona ia laasia lea o le paepae e afua mai i le uluai paepae seia paia le lona iva, ona ia tootuli lea ma faapea ane, “tulouna lava.” E manatu e faapena se lagona i lenei aoauli. Ae ou te le i laasia la le paepae lea e agai atu i le malae i Tiafau, o le malae o le faautugatagi a Samoa, o le malae na fafau ai ti’a o le Malo Tutoatasi o Samoa, o le malae na saili ai lo tatou saolotoga mai pulega faa-kolone a papalagi. O le malae foi na faaunuua ai ni outou tuaa ma ni o matou matua aua le tapenaina o le faavae o lo tatou Malo Tutoatasi. A o le Maota foi ua soo ona taiao, ma ua tulutuluitao.

E muamua ona ou toloa umuloa ma ou taia le tu tafaitoa ma ou faatulou, tulouna lava. Ou te muai faatulou i le paia o le Tafatolu Fefaatauagai o le Malo. Tulouna le Fono Aoao Faitulafono o le Palemene, afio lau Afioga i le Fofoga Fetalai, afio lau Afioga i le Sui Fofoga Fetalai. Ee papaaao lau Afioga i le Taitai o le Maota, lau Afioga i le Palemia ma lena Itu o le Maota o le faigamalo a le Vaega Faaupufai o le Faatuatua i le Atua Samoa ua Tasi.

A liliu mai i lenei itu o le Maota, ua faafesagai segaula, a ua faatauata foi le la ma le masina. O lea e afio atu le Afioga i le Taitai ae tainane foi sui usufono o lenei Vaega Faaupufai e Puipuia Aia Tatau a Tagata. O lupe lava na faia mai le fuifui i le filifiliga sa alo atu i ai lo tatou atunuu i le ono masina talu ai. O lupe sa vaoseese, a ua fuifui faatasi i le alofa ma le agalelei o le Atua.

Susu lau susuga i le Failautusi, susu foi le Satini o le Maota, le Agai ma le Ofisa o le Fono Aoao Faitulafono. Tulouna le paia o le Pulega, le Executive, le afio o lau Afioga i le Palemia, afio lau Afioga i le Sui Palemia, afifio alii ma tamaitai Minisita o le Kapeneta. Afifio Minisita Lagolago, o Ofisa Sili o Pulega o Matagaluega ma Faalapotopotoga Tumaoti a le Malo, o vae ia ma lima o le Malo.

Tulouna le paia o le Faamasinoga, le Afio o le Faamasino Sili, afifio alii ma tamaitai o le Faamasinoga Mauuluga. Afio lau Afioga i le Peresetene, afifio alii ma tamaitai faamasino o Fanua ma Suafa, le Pulega ma le Ofisa o Faamasinoga.

Tulouna le papaaao o le Afioga i Le Ao Mamalu o le Malo, o le faa-Ao o le faigamalo, le afio o lau Afioga i le Tuiaana Tuimalealiifano Vaaletoa Sualauvi le II ma lau Masiofo. Afio lau Afioga i le Sui o le Fono a Sui Tofia lau Afioga Le Mamea Ropati Mualia ma lou Faletua.

O ou paia na ma sa na o le Tafatolu Fefaatauagai o le Malo Tutoatasi o Samoa.

Ou te faapai atu i le tapuaiga a Samoa e afua mai i Lalovi ma Malaefonoa i le Mata Aleipata e oso ae ai le la seia paia Fili ma Puletuu e goto atu i ai le la na tauilo ai Malo. Le paia aua le afifio o Tama ma latou Aiga, Aiga foi

ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti. A o Samoa foi e maota tauave ae tainane malae e fia e faitau i ai le atunuu. Tulouna lava.

Ou te faatalofa atu foi i le aufaigaluega paia a le Atua o lo o faanonomanu aua se manuia o lo tatou atunuu.

Ou te faapai atu foi i le faigamalo a le Motu i Sasae ia Tutuila ma Manua, i le afio o le Kovana Sili, le Lutena Kovana, le Fofoga Fetalai, Sui o Maota e Lua. O le paia lava lea aua le faleagafulu, Sua ma le Vaifanua, Fofu ma Aitulagi, Ituau ma Alataua, Saole ma Saleaamua ma le Launiu Saelua. Faatuiolemotu, le Laau Amotasi, Tootoo o le Faleula ma upu ia te oe le Manuatele.

O paia na o Samoa e afua mai i le taisamasama o le Tuimanua seia paia Fili ma Puletuu na tauilo ai Malo. Nuunuu atu faatini o Tausala i Faleupolu o Tofiga aua o le latou fatuaiga tausii lea. Ae se i ou liliu ane i si ou itumalo, le itumalo o Falelatai ma Samatau.

Falelatai, o tatou o le aiga e tasi. E tasi lo ta fala, tasi lo ta aluga, e tasi foi lo ta ieafu tulou. O le paia aua le afifio o le falefitu o le Atitagaloa o le aiga Tauoaana. Afio la outou Tama le Afioga i le Tuiaana Tuimalealiifano, lana Masiofo ua avea nei ma Ao Mamalu o le Malo Tutoatasi o Samoa, le Taausoalii ma Tama a Tausala. Afio Fasavalu ma lona aiga, afio Taiivao na falefia i ai Aiga, ae matua le tuu i Pata, o le malae ma le tupua e alalatai ai Galuefa ia te oe Falelatai ma le Tagata o le Vavau, o lo outou tula aiga.

Si ou nuu i Samatau, le afifio o le falefa o usoalii, Fime ma le Gafa, afifio alo o Tamaalelagi, Maopu o le Tuiaana, alalatai le saofaiga ia te oe le Matua Leulumoega.

O le paia foi i saoa ma tamaitai o faletua ma tausii, Toleafoa ma le aumaga, le tupulaga palota o tama ma teine, o tama fanau i so o se tafa o le lalolagi, o tatou paolo po o tatou gafa e maualuga ai lo tatou itumalo i itu e fia o le lalolagi. Le tapuaiga a faafeagaiga tau i le lagi ma le aufaigaluega paia a le Atua i so o se fatafaitaulaga o lo o faanonomanu ma tapueina le ola faaleagaga o lo tatou itumalo.

E momoli atu le agaga faafetai tele mai le taele o lou agaga i la outou pule ua toto tetele e ala i la outou faiga filifiliga ma le faiga palota o le aso 9 o Aperila 2021. O lea ua ou sapaia faatuaeleele. O se manaoga sa tuuina atu i lo tatou itumalo e fia faaauau se tautua ma se auaunaga i le Malo e ala i le Palemene. Ua na o se foe lava e faaee i le tau, o se sega foi e faatulauniu, pe a na le tusa ma le tofa ma le faautaga i le faiga filifiliga sa alo atu i ai lo tatou itumalo, lea na outou tusiaa ai e avea le tagata faatauvaa ma tofi faipule o lo tatou itumalo mo le Paeaiga Lona XVII lenei o le Palemene.

O upu masani a le atunuu i le sailiga o mea nei o tofiga, sama se mago, saili i le vao se mataalia, saili i le tai se agavaa. O la outou pule ma la outou faaaloalo, o le a ou le seiina i lou taliga ne i lelea i le matagi. O le a ou le paleina foi i lou ulu ina ne i satia e manufelegele. O le a ou le asoaina foi i lou

ua ne i motusia, ae o le a teu pea i le va o lou fatu ma lou mama ou te manatua pea i taimi uma ou te manava ai.

O la le fai Salamo, “Afai e galo oe ia te au, ia galo lava i lou limataumatau. Afai foi ou te le manatua oe, ia pipii ae lou laulaufaiva i lou gutu.” O le a ou taumafai i se mea e gata ai le malosi ae faalagolago i le fesoasoani a le Agaga Paia, faatasi ma la outou tapuaiga, ou te tautua ai ma le faamaoni i totonu o lenei Palemene, e pei ona molimauina i lau tautoga ua uma ona faatino i totonu o lenei Fono Aoao, e fai se sao o le tatou itumalo i lenei Paeaiiga Lona XVII. Ou te moomia la outou lagolago tatou te galulue faatasi ai e atiae lo tatou itumalo ina ia manuia tagata uma, e tafiese le moemoenoa ma le laufaleaina, le mativa ma le ola faalagolago.

E le faagaloina foi i latou i tama ma tina ua faailagi le latou tuligasia talu mai le tatou faiga palota, le afioga i le Faaaloaloga ia Misa Gogo, le afioga i le Faaaloaloga le Taitaifono ia Taefu Lemu, le fetalaiga i le Tootoo ia Lavea Tuaitau Tuputau, le afioga ia Lealaitagomoa Faavae, le fetalaiga ia Saula Fa Talolua, aemaise o le tina matua ia Tuuamaleuluaiialii Letufuga. Ia tafimala la outou faigamalaga, tatou feiloai i se aso o i luma. Faamaise ma faamafanafana le agaga o le Atua i le tatou itumalo.

E avea foi lenei avanoa e molimoli atu ai le agaga faamalo ma le faafetai i tamalii ma failauga sa o matou tauva i le faiga palota. O le upu moni, e le mua uma ni vaa, e toe oso foi le la. O a au nei, ae o a oe taeao. E au i le tauola e au foi i le fagota.

Lau Afioga Taefu Lemi, o le sa tu mai i le foe o le tatou itumalo i lona 10 tausaga na se i mavae atu nei, ua faamalo fai o le faiva. Ua se togi le seu na lagatila ua e faapulou i le tualima, ua faamalo fai o le faiva. O lea ua tau lou ai i lou sao taua i le tatou Vaega Faaupufai, aemaise foi upufai o le tatou Malo ma le atiaeina o le tatou itumalo. O le Atua na Ia tofia lau Afioga, o le Atua foi ua Ia toe aveeseina. Ae aua le faanoanoa, e saunia pea e le Atua avanoa e faaaga i ai ou tomai ma ou agavaa. Ou te moomia foi lau lagolagosua ma lau fesoasoani a o ou tulai mai e tauave le Nofoa o le tatou itumalo.

E momoli foi le agaga faafetai i lau Fetalaiga Pau Roy i le feagai ai o le tatou nuu ma le tatou itumalo ma le tatou faiga filifiliga. E tele luitau sa o tatou feagai, sa faatasina foi lo tatou nuu ma le itumalo i le faamasinoga. Ae faafetai, faafetai ua fale i le fale o le Atua lou finagalo, o lea ua teuteu ma toe ave i tua. O mea ia e moomia e le tatou itumalo, aua o le talafaasolopito o le tatou itumalo, o se taimi muamua lea ua oo ai le tatou faiga filifiliga i le faamasinoga. E momoli atu le agaga faafetai. O upu a le potu, “E sili le na te pulea lona loto i lo le toa na te aea le olo.” Faafetai. O lau pule lea. E moomia e lo outou sui usufono lau lagolagosua. E tele tomai ma agavaa ua faamanuia ai lau fetalaiga e le Atua. Tuu mai lou tauau tatou tausoa faatasi le avega.

Lo tatou itumalo, ou te manatu ua taia i la outou silasila, ua taia foi i la outou faafofoga le tulaga o upufai ma le sailigamalo i lenei foi Paeaiga. O le tatou itumalo, o le sui faavae o le HRPP, o le Vaega e Puipuia Aia Tatau a Tagata e oo mai i le taimi nei. O le tatou itumalo foi o lo o tulai mai ai Le Ao Mamalu o le Malo mo se taimi muamua talu ona tutoatasi, talu le faigamalo a le HRPP. O se faaaloaloga e pito sili ona maualuga, e le tatau ona tatou faagaloina o le Faigamalo e limalima lelei. Ua silasila foi lo tatou itumalo i le malosi o le faatosina i tupe, a o le mea lea sa nanau i ai le Faigamalo a le HRPP i le Paeaiga na tuanai atu, ina ia maua avanoa aemaise o matai tausinu, o i latou e le lava se tamaoaiga e tauva ai i le tofi o le itumalo, a ua a nei? Talofa, a faaauau ai i le tulaga lea e i ai, o le lumanai na o e mautupe ma e maumea o le a mafai ona saofaga i filifiliga o mea nei o sui usufono o le Palemene.

Lau Afioga i le Fofoga Fetalai, e fia molimoli atu ia le faamalo ma faamanuiaga a lenei itumalo i lau Afioga i le Fofoga Fetalai, i lou tulai mai e tauavea le Maota o Samoa i lenei foi Paeaiga, o ou mama na. E faapea foi ona molimoli atu le faamalo ma faamanuiaga a lenei itumalo i lau Afioga i le Palemia, congratulations. O le Palemia tamaitai muamua o le Vasa Pasefika.

O Togianamuaimalae lenei, o le uluai Fiame, e ui lava ina tatou sootino ma soototo, ae ua o tatou feeseeseai lava ona o talitonuga faaupufai. Ia manuia lou tulai mai faapena foi lena Vaega Faaupufai, le Afioga i le Sui Palemia, Minisita o le Kapeneta faapea Minisita Lagolago ma le Paia maualuga o le Faigamalo o le FAST, Faatuatua i le Atua Samoa ua Tasi.

Ona ou liliu ane lea i manaoga o si ou itumalo lau Afioga i le Fofoga Fetalai, o aualatetele, o le a ou le agai i Minisita taitasi, ae o le a ou agai i le aotelega, ona e manumanu foi i lo tatou taimi. Faafetai i le Pule ma le faaaloalo ua tulai mai ai le tama o le Aiga Tauaana i le Ao Mamalu o le Malo, ae pau lava lea o le talosaga, e le o lelei aualatele. E fai si mamao i tua, amata atu lava i Mulifanua i le uafu, seia paia lalo o le mauga o lo o va ai ia Falelatai ma Faleaseela. O le tatalo lea a lenei itumalo, ia alofagia.

E tatalo atu foi lenei itumalo, e fia faataoto se auala e fesootai atu ai Faleolo, fesootai sao i Falelatai ma Samatau, ma toso atu ai ma le laina eletise ma le suavai taumafa. I le vaai a lenei itumalo, o i i Faleolo, o lo o tele punavai o lo o i ai, ae o le faigofie foi ona tafe mai i luga o le mauga ma le mea maupuepue le suavai o si ou itumalo. O le taimi nei, o lo o gata le suavai taumafa o lo o alu i le mita, i le pitonuu i Siufaga. Ao lo o ola pitonuu i Matautu ma Pata i le Vai Tumaoti. Ae peitai ua matauina, ua le gafataulimaina e le Vai Tumaoti ona supply le suavai i le nuu atoa, ona ua faatuputupulaia le aofai o tagata. O le mea e faataatia atu i le Faigamalo, se i silasila i le vaega lea.



O le tulaga i aualagalua, mafatia lenei itumalo. O le tasi lenei o itumalo e malosi i le faiga o faatoaga, ae peitai e le o lelei ma faaletonu ia ona auala galua i pitonuu uma o si ou itumalo.

Na ou oo mai lea i le falemai, o lea ua uma ona pasia le falemai o lenei itumalo, i le Paeaiga ua mavae atu. Ae na ona matou faamanatu atu, o le talosaga a lenei itumalo, ia aua ne i avea le fesui ai o Faigamalo, ma mafuaaga o le a toe liliu ai la outou silasila, ma la outou faasoa i le falemai o lenei itumalo.

Faasolo ifo i malaetaalo ma faleaoga, o le tasi lenei o itumalo, o lo o tulai mai ai le tele ma le anoanoai o tama taalo ma teine taalo, ae peitai e leai se malae taalo lelei e faatino ai lenei atinae lelei o tupulaga, o le tatalo lena.

E faapea foi i faleaoga, e lua faleaoga o si ou itumalo ua afaina i le tulalata i le matafaga. E manaomia le toe faia o nisi faleaoga fou, aveese mai i nofoaga o lo o i ai i le taimi nei.

O le tulaga i faatoaga, lau Afioga i le Minisita, o lo o taumafai lo tatou atinae o le talo. Ao lau lava vaavaai, e oo mai i le aso e le o mafai ona o tatou manumalo i le talo a Fiti. Ae o lea foi e maua i suesuega, e laitiiti le maketi o le talo i fafo i Niu Sila, Ausetalia ma Amerika, ae sili atu le maketi o le manioka ma le umala. Ua fia faasaga lenei itumalo e atiae e le gata i le talo, ae faapea foi le manioka ma le umala. O le koko foi ma niu, ao le faafitauli lava lea e tulai mai, e le o lava maketi e ave ai i fafo.

O lea ua ou vaai atu i le Tala o le Tupe, o lo o i ai se vaegatupe e faatino ai se authority e maketiina ia tatou oloa i fafo. Ae lea foi e le o po se silafia, ua maea ona faatau e le Malo ia le maketi ma le fanua i Aukilani, amata mea ai le Faalapotopotoga o le STEC. Ia o le tuualalo lena, ne i o tatou o foi toe fai se isi mea fou, ae uma ane, e alu i se tagata e toatasi. Ae taua le tulai mai o le tatou Malo, e saili maketi i fafo, ina ia mafai ona ave ai fua o faaeleeleaga a lo tatou atunuu.

O tulaga i taligalu, tasi lenei itumalo e afaina tele i le siisii o le tai, ae peitai ua na o se vaega sa faamanuiaina i le polokalame o le taligalu sa faagasolo atu.

O galuega faavaitaimi, e pei ona silafia e lenei Maota, o le itumalo lenei sa muaimalae i le atinae lea. O le tamalii o lenei itumalo sa ia aumaia le polokalame lenei, ae peitai o lea ua matau atu ma le agaga faanoanoa, ua ese le tulaga ua agai ai ia le faatinoina. O le tuualalo a lenei itumalo, e lelei ona toe faafoi mai i le Malo e faasoasoa tatau ai, ia tofua tutusa itumalo ma tagata e faamanuia ai i lenei atinae taua, ae le o le saili ai o manuia o tagata e toaitiiti.

Lau Afioga i le Fofoga Fetalai, ona ou oo mai lea i le Tala o le Tupe, o lo o faapea mai le Tala Autu o le Tupe 2021/2022 ia poupou, atiae ma faasoasoa tatau ia le tamaoiga mo le siitia o le soifua manuia o tagata uma o Samoa. O le fesili, aisea e poupou ai? E i ai le talitonuga o lenei itumalo, o lo o malosi ia le tamaoiga o le tatou atunuu. E ui lava ina feagai ma mala

faalenatura aemaise o le faamai oti, o le Koviti-19 aemaise foi o le misela ua mavae atu, ao lo o i ai lava lo tatou tamaoaiga i se tulaga malosia. O se faataitaiga, o lea sa i ai le Tala Faatatau o le Tupe i le tausaga na se i mavae atu, e \$116 miliona, \$180 le tupe e ova ai Tupe Faaalu i lo Tupe Maua. Ao lea e maua i suesuega, i faaiuga o le Tala Faatatau o le Tupe faaiuina i le Aso 31 Iulai 2021 o lo o surplus mo se taimi muamua.

O le Faiga Faavae a le Faigamalo a le HRPP sa sau ai, sa ave le faamuamua i le tamaoaiga ma le talitonuga, wealth is health. A siitia le tamaoaiga, e le taumate o le a siitia foi le tulaga o le soifua maloloina ma vaega uma o le atunuu. Aepeitai o lea e matau atu i le faataatiaga o le Tala Faatatau o le Tupe 2021/2022 o lo o ave le faamuamua i le Social Developments. O le fautuaga a lenei itumalo, e pei ona maua i saunoaga a nisi o sui usufono, a taumafai lo tatou Malo ina ia faatupulaia ia le vaega lea o le tufatufa atu o tupe, e manaia. E leai lava se isi o tatou e le manao e maua se tupe, maua fua se tupe ae o le tuualalo a lenei itumalo, se i silasila totoa, ne i te i ua avea ia lo tatou alofa faavalea i lo tatou atunuu ma mea e valetuulima ai ia lo tatou tofi.

O lea foi e maua i le Tala Faatatau o le Tupe, o le a pau maualalo le tau o le eletise ma le tau o le suavai. E le gata i lea a ua faaitiitia foi fesoasoani tuuina atu a le Malo, e tauala i le CSO e fesoasoani ai i galuega e le maua ai se polofiti a Faalapotopotoga. E pei foi ona silafia sa galue i le Matagaluega ma le Faalapotopotoga o Malosiaga faaeletise. O le taimi nei, toetiiti latalata i le \$3 miliona le tupe e alu e totogi ai le eletise o lo o faaogaina e moli o le auala. A o lea e matau atu, e utiuti lava se fesoasoani o lo o ave i ai.

O lona uiga e tau mai ai, e le gata i le faatuputupulaia o aitalafu a le Malo i le Faalapotopotoga, ae o le a le mafai foi ona faatino e le Faalapotopotoga le fesoasoani i o tatou tagatanuu. Ae tatau foi ona fai ma le faateete aua o lo o i ai le matafaioi a Faalapotopotoga ia tausi a tatou aseta, ia aua ne i faateia i tatou i se taimi e tulai mai ai ni faapefea. Aua o le mea moni, o afi eletise o lo o gaosi ai le tatou eletise, e le laititi se taimi e tapena ai. E tolu (3) i le lima (5) tausaga e faatino ai le aumaiga o se afi fou. Ae a faatamala i tatou i le tausaga lelei o a tatou meatotino, ina ua o tatou taumafai e faaitiitia tupe e alu i le operations, o le tulaga matautia lena e oo i ai tatou.

E manatu lenei itumalo, o lo o i ai foi vaega o lo o taua ai le toe iloiloga o le Tulafono. O lo o i ai lo tatou Law Reform, e i ai le manatu o i tonu e tatau ona agai i ai le iloiloga o le Tulafono, e pei ona aumai i le Tala o le tupe. O le isi vaega lau Afioga, ua matauina le i ai o se vaegatupe mo le Siosiomaga mo le totoina o laau. O se vaega taua lea, aua e pei ona silafia, i atunuu e maualuga lo latou tamaoaiga, o i latou foi ia e pitosili ona leaga ai le Osone. O lo o latou vaavaai i ni avanoa e toto ai laau. Ae o lea e i ai le tatou poloketi ua leva ona faagasolo e le Malo, o le One Million Tree.

O le popolega o lenei itumalo, i lenei foi poloketi ma le faamoemoe e pei ona faaataata mai, ne i te i ua i ai se isi e manuia na o ia i nei fuafuaga.

O na i motugaafa ia lau Afioga i le Fofoga Fetalai, e tuu atu i le Malo aemaise le Afioga i le Minisita o tupe e fai i ai la outou fuafuaga a o se matou tuualalo lena.

E momoli atu le agaga faafetai tele, i lau Afioga i le Fofoga Fetalai, mo le avanoa o lenei itumalo.

Ae ua i ai le manatu o le a seseu i fanua le matou vaa, ae ia manuia tele le tulai mai o lau Afioga i le Fofoga Fetalai, faapea foi le Afioga i le Palemia, le sui Palemia, ma le la Itu o le Maota i Minisita, faapea foi Taitai ma lenei Vaega Faaupufai ae ou ola i le alofa ma le agalelei o le Atua. Soifua.

*Na faaalua le agaga fiafia o le Maota i le patipati o latou aao i le maea ai o le Saunoaga Faa-Taupou a le sui usufono mo Falelatai ma Samatau.*

**FOFOGA FETALAI:** Ua faamalo saunoa, tanoa i lau Afioga i le sui mamalu mo Falelatai ma Samatau. Ou te talitonu o lea ua manino lava lou finagalo folasia aemaise foi o lau fautuaga mo le tatou Malo. Aua foi le faatinoina o tomai ma agavaa a o galulue foi i le Malo, ou te talitonu o se fesoasoani taua lea, o se fesoasoani sili lea mo le faagasologa i luma, a o le tatou atinae ma lo tatou Malo aua lona manuia. O le mea lea faamalo faafetai. O lea lava ua oooo lava lau saunoaga i tulaga uma. E le gata o le itumalo a o le Atunuu atoa. O le mea lea, faafetai i le sui mamalu, malo le tapena, faafetai foi le faasoia mai, fautua mai aua lava le agai i luma o le galuega aemaise foi o le fautuaga mo le tatou Tala o le tupe.

O le mea lea faamalo faafetai.

O lo o i ai le avanoa mo se tasi o tatou sui usufono. E matau atu o lea ua fou mai le sa o le sui mamalu mai Safata 1. Lau Afioga Leana Ronnie Posini. E tasi foi lea sui usufono tuai, ou te talitonu foi o le a le toe taupou, o le agai sao foi i le Tala o le Tupe.

Saunoa maia le sui usufono mamalu.

**Afioga LEANA RONNIE POSINI (Safata 1):** Lau Afioga i le Fofoga Fetalai ma le paia o le Maota. Ae muamua ona ou faatulou i le paia o Samoa, aua le afio o le Ao mamalu o lo tatou Malo ma lana masiofo. Afio foi afioga i le sui tofia ma le faletua. Afio foi le mamalu i le Faamasinoga. Afio le Afioga i le Faamasino Sili ma le mamalu o le Faamasinoga. Afio foi lau Afioga i le Peresetene ma le mamalu o le Faamasinoga ma le Matagaluega o le Faamasinoga.

Afio lau afioga i le Palemia ma lau Kapeneta. Afio foi ia Minisita Lagolago ma le mamalu foi o lenei Palemene.

Le afifio o Taitai o ekalesia o lo o faanonomanu aua se manuia o Samoa. Le paia o Samoa i le afifio o Tama ma Aiga, Aiga ma Tama, le Usoga a Tumua ma Pule, Ituau ma Alataua, Aiga i le tai ma le Vaa o Fonoti.

O paia foi i le Malo i Sasae i le afio o le Kovana Sili ma le paia o le Faigamalo.

O lea foi e matau atu o lea foi e afifio Ofisa sili o Pulega o Matagaluega o le limataumatau o le tatou Malo. Faamalo tautua, faamalo i le tautoga na tauto ai e tautua ma le faamaoni lo tatou Atunuu.

Lau Afioga i le Fofoga Fetalai, o lau Afioga o le isi itu pule o le Tafatolu o lo tatou Malo. E tutoatasi foi lau afioga, e le seua foi e se tasi o sui o le Maota lenei faaiuga fai, e fai e lau afioga. O lea e momoli atu ai le agaga faamalo i lou tulai mai, aua le tauaveina o le tatou Palemene nei.

Ou te talitonu o le a tau agai loa se manatu e uiga foi i le Tala o le tupe. E muamua ona faamalo i lau Afioga i le Minisita o tupe, i le Tala o le tupe o lea ua faataoto nei i totonu o le Palemene. O matou faalogologo mai ona ua le tutusa foi ma tulaga na tau amata ai le tatou Palemene. O lea foi ua matou maua tusi aua lava le saunoaga matagofie a lau afioga i le Minisita. E talitonu foi, o i lea o le a tau fua atu ai so matou manatu, o matou foi manatu, e manatu e tuualalo atu, e lagolagosua atu i le mamalu i le Kapeneta ma lau Afioga i le Palemia.

Ae muamua ona tau amata atu se matou tala, i le saunoaga a le Minisita o Tupe, i le faaupuga o le Taiala o le tala o le tupe. E tau fua i ina ni mafaufauga ma se matou foi lea tuualalo. E muamua ou vaai atu i le faaupuga lena e i ai. Faalelei le soifua manuia. A o le mea la e sosoo atu ai, la e i ai le faaupuga faapea, penisione a tama ma tina matutua.

O le mataupu lea, o le mea moni lau Afioga i le Fofoga Fetalai. E le i malolo le matou itumalo, aemaise le taimi na tulai mai ai le FAST e tauaveina le tatou Malo. Ua alalaga foi tagata o lo matou itumalo, le aumatutua. O lea ua agai atu ia te au, e \$300 lea o le a maua i le penisione, aepeitai o lea ua maua mai i i, e leai e le \$300 e \$200. Ou te talitonu foi, o le \$200 lea sa faataoto e le Faigamalo a le HRPP ma latou pasia, o le penisione lea e \$200. Ia o lea ua faalogologo mai lo matou itumalo, o Safata Nu 1 ma Safata Nu 2, e leai o lea ua ou tautino atu, e le \$300 le tatou penisione, e faamalulu atu ai. Ne i te i ua outou tuuaia lo outou sui usufono. E leai o au lea na ona ou sau e momoli lo outou finagalo i totonu o le Maota leni.....

**FOFOGA FETALAI:** E fesoasoani atu i le sui mamalu, ou te iloa o lea ua uma ona faamanino, e le o i ai se fuafuaga i le tala o le tupe. O le Tala o le tupe o lo o manino lava e \$200 le aumatutua. O le mea lea, ne i te i foi ua maoaluma ai lo tatou Atunuu i lea saunoaga. O lo o manino lava le tatou Tala o le tupe, o lo o faamanino ai foi le \$200 mo nai o tatou tagata matutua. O le mea lea....

Se i tulai mai le Minisita o Faatoaga ma Faigafaiva.

**Susuga Hon Laauli Leuatea Polataivao Fosi:** Faafetai. E masalo o lea ua faalua ona ou tulai atu lava i le mataupu lenei. E leaga o la e faalogologo lo tatou atunuu, ne i aveseseina le mau a le Faatuatua i le Atua Samoa ua tasi, tau ai le mataupu lea. A outou silasila i faasalalauga uma lava na fai, e \$200 i le masina, pau lava lea. Na matou avea foi e le i faataatia le tala o le tupe lea e te saunoa nei i ai i Faiga Faavae a le Malo lea ua uma atu. E lelei le faamanino atu pea lau afioga i le Fofoga Fetalai, ne i te i foi ua toe tu ae se isi. Leaga o tatou finauga ia na fai, na matou fai atu e \$200, ae outou o talai e \$300 ae faalua i le vaiaso le matou upu na fai.

O le ala lea, malie le Maota, e faamanino. E leaga a matou fai atu le tala muamua ae outou o foi mimilo le upu. Ia malie lau Afioga i le sui mamalu, o le faamalamalama lenei. E le i i ai se taimi na saunoa ai le Faatuatua i le Atua Samoa ua tasi, e \$300 ae faalua ona tala. Ina ia manino ma malamalama, o a outou lava talaiga na fai, e \$300 ae tala faalua. Ma le faaaloalo.

**FOFOGA FETALAI:** Ou te iloa o le sui mamalu o lea ua manino lea tulaga, ina ia aua ne i toe...o lea lava e manino.

Se i saunoa mai lau Afioga i le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoui:** Lau Afioga i le Fofoga Fetalai, e leai se talaiga a matou na faia i ni penisione, e leai lava ma se mea. Na o nei ina ua tapena le Tala o le Tupe faaleoleo, ona matou tilotilo lea i le gafatia, na ou faasalalauina mai foi. E \$30 miliona le tupe lea e alu i le tatou penisione, ae a fai e sii i le \$200, o lona uiga e \$7 miliona e toe faaopopo ma e gafatia. O lona uiga o lenei ua leva ona uma le faiga palota, ae leai lava ma se matou talaiga na faia i se penisione o le a siitia i luma atu o le faiga palota.

**FOFOGA FETALAI:** Ia faafetai, atonu o lea ua manino lea tulaga. O lea foi ua faamalamalama mai foi e le Minisita o Faatoaga ma Faigafaiva ia le tulaga o i ai foi lo latou faamoemoe. E talitonu faaauau le saunoaga e le tatau foi ona tatou toe foi i tua. Le agaga faaaloalo le sui mamalu.

**Afioga LEAANA RONNIE POSINI:** Lau Afioga i le Fofoga Fetalai, ou te manatu e ala ona taua i lou manatu, leaga o lou itumalo lea na filifilia au ou te sau. Ae a o atu foi la e faatagi atu lo latou manao ma mea sa faalogologo i ai. E le avea i lalo le finagalo o le itumalo. Na ala ona ou oo mai i totonu o le filifiliga a le itumalo. Ae a fai ou te tau tata i lalo ma ou le faaalua le mea na agai mai ai, o se agasala tele lea ia te au.

**FOFOGA FETALAI:** O le mea sili faafetai i le sui mamalu, o lea ua ou maua atu, e leai o le finagalo o lo outou itumalo, e finagalo ia \$300. O lea

ua faamanino mai e le Malo ma le tala o le tupe, ia e \$200. Ia faatea ia i nuu le aina ae tatou agai loa i luma o lea ua malamalama le mataupu.

**Afioga LEAANA RONNIE POSINI:** Ia faafetai tele i lau Afioga i le Fofoga Fetalai, e leai na ona, e le faasaoa foi le saunoaga a lau Afioga. E pau lea o le mea na agai atu ai finagalo o lo matou itumalo, o le finagalo lea sa taua, o le \$300, e pei ona folafolaina, ae le toe oo i ai sau faamatalaga.

**FOFOGA FETALAI:** O le tali a le Malo, o le tali mulimuli lena lau Afioga i le sui mamalu. O le mea lea, o lea e faafogafoga mai le Atunuu, ia aua ne i fenuniaia le faafogogaaga a le atunuu. O lea lava ua manino le faamalamalama, o lena. Ia sui mamalu tatou see ese i se isi mataupu.

**Afioga LEAANA RONNIE POSINI:** Ia faafetai tele i lau Afioga i le Fofoga Fetalai. Ou te faafetai foi i mea ia o penefiti o le mamalu o le Atunuu, o lo o i ai manaoga tumau. E talitonu foi, na ou vaai foi o i ai le tapenaga a lo tatou Malo, i le Faigamalo talu ai, ae faafetai o lea e matau atu, o lea e faaauau le tulaga lea.

O le tulaga o le fesoasoani lea i le tulaga lea e taua i le fauina o fale. O lea ua ou maua foi i totonu i le saunoaga a le Minisita o tupe. O lea foi sa faatino e le tatou Malo talu ai. E manatua foi o lea e i ai le vaega foi lele o le Faalapotopotoga o le ADRA, o lea sa ave i ai e lo tatou Malo ia tai miliona.

O le mafuaaga o le mea lena, ia aveese atu ma le Malo, ae ave i le Faalapotopotoga tumaoti e i ai le saolotoga ma le filifiliga sao, o aiga e faatino ai le fesoasoani o mea tau fale. O lea e momoli atu ai le agaga faafetai tele.

O le isi mataupu lea e taua ai pea i luga o le mea lea e... o le sauaina o tina ma tamaitai. Ia faafetai tele i lau Afioga i le Fofoga Fetalai. O le Vaega Faaupufai foi lenei, o i lava lea e ave i ai lana faamuamua. E tasi lea mea... e le gata i lau matau, o le sauaina o tina ma tamaitai, e le gata i le faaoolima a o mea ia o upu lafo. Leaga a manua le loto, e le iloa po o afea tausaga e uma ai le manua lea, ma le mea e tupu pea. O lea ua matau atu, o lea e faataua i le tatou Faigamalo.

Ia faafetai o lea ua i ai le agaga o le faataua o tina ma tamaitai sauaina.

Ona ou oo mai lea i le ...tau atu i le isi vaega lea, siitia o le soifua maloloina. E faafetai o lea foi e tau matau atu, o lea o le a oo le fuafuaga a le Faigamalo talu ai, o meataumafa i le falemai tele i Tuasivi. Sa i ai le fuafuaga a o lea ua ou vaai atu o lea o le a taoto i ai. Aua e pei o lea e tau matau foi i fuafuaga a le tatou Faigamalo fou nei, o lea o le a faapena foi falemai faaitumalo. Sa tau i ai foi le manatu i isi taimi, ae sa faapea, o la e nonofo lava i totonu o nuu totonu o itumalo, e le faigata ona felauai tulaga o mea taumafa.

Ona oo mai lea i le faaupuga lena e i, i ina i le saunoaga a le Minisita o tupe.

**FOFOGA FETALAI:** Ua ou vaelupeina le saunoaga matagofie a le sui mamalu, e talitonu ona o lea ua tatou taunuu mai i le taimi o le tatou malologa masani, o le ala lea o lea ua tatalo atu ai i le sui mamalu, se i foi mai. Tatou malolo ona faaauau lea o le saunoaga.

Ou te faasilasila atu ua faataatiaese nei Galuega a le Fono Aoaofa Faitulafono mo lana malologa e 15 minute.

*Na faataatiaese Galuega a le Fono Aoaofa Faitulafono mo lana malologa masani i le itula e 3:45 i le afiafi ma toe faaauau i le itula e 4:25 i le afiafi.*

*Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe 2021/2022.*

**FOFOGA FETALAI:** Ou te faasilasila atu ua toe amatalia nei ia Taulumaga o le Fono Aoaofa Faitulafono. Ua faamalo le onosai, malo le faatoatoa, o lea ua o tatou taunuu mai i le vaega mulimuli o lenei aso. E i ai le taofi ua maua se faasiliga malosia i le paia o le Palemene.

E faataatia ese ia tatou Taulumaga o lo o saunoa le sui usufono o Safata Nu.1, o lea ou te tapa le sui usufono e tulai mai e faaauau lau saunoaga

**Afioga LEANA RONNIE POSINI:** Faafetai i lau Afioga i le Fofoga Fetalai mo le avanoa, ou te talitonu foi ua maua se faasiliga malosia i lau Afioga i le Fofoga Fetalai, aemaise foi le mamalu o lenei Maota. Ia o le a taumafai e faaauau atu se manatu o lenei itumalo.

Ona oo mai lea o la matou faamatalaga i le vaega o lo o taua i totonu o le Tala o le Tupe, lea e faapea o le soifua aoaoina. O le mea moni lava lau Afioga o le tele o faiaoga o lo matou itumalo i tua o fesilisili mai po o afea e sii ai ia o latou totogi. Na amata mai le faaupuga lea e le i faia ia le faigapalota. Ia o lea la o lea ou te tau matau atu i i, e pei e le o atagia mai i i le tulaga le siitia o totogi o faiaoga o aoga a le Malo. O le mea lea ou te tau mautinoa, ua alu i lalo le tupe lea o le grant foi lea e ave i a tatou aoga lea ua ou tau matau atu lea ua fai si pau i lalo.

O isi mea ia ou te matau atu o mea ia o atinae o mea ia o taaloga. O taaloga e tasi lea o lumanai e pito sili ona taua i le vaitau lenei, aua e talitonu o tagata ua maua le taleni i mea tau taaloga, o le matua tupe tele lava e maua. O le mea foi lea ou te talitonu e ave ai le faamuamua a le tatou Malo i tama fanau e i ai taleni i so o se taaloga lava. Ia ae lea ua ou matau atu, o mea ia o atinae e ave i mea ia mo malaetaaalo ma tulaga faapena, matau atu ua tele lava le palasi i lalo o tupe ua ave i ai. Masalo e oo i ai se tala i le taimi o auiliiliga o meataitasi ia ae o le faamamafa lena o le tatou Malo ave le tatou faamuamua

i tulaga i tagata o lo o i ai taleni. Ua o tatou vaavaai foi i lo tatou atunuu e tele ia taleni o i ai, ia ae o lea ua matau e pei ua palasi i lalo le tupe e faaagaga i ai mo mea o malaetaalo.

Ia ona oo mai lea o se faamatalaga a lenei itumalo i le faatupulaia o pisinisi. O lea foi ou te matau atu e i ai se tupe lea ua faamatuu i ai. Lea ua i ai le vaegatupe lea ua faamatuu i ai i le Tala o le Tupe lenei. Ae o lea ou te tomanatu ma ou matau i le Faigamalo lea talu ai, ia sa fai mea foi ia o le faamama avega e lo tatou Malo stimulus package. Sa fai la le mea lea o le Phase 1 ma le Phase 2. Ua maea la, lea sa faapea e toe tapena ia le Phase 3. Ao le matau atu i le tupe pau mai i le faamama avega lea sa i ai, e oo atu i le 60% le pau o le fesoasoani lea sa ave mo le aufaipisinisi. Ia ae manatua foi lau Afioga i le Fofoga Fetalai e le taga tasi ai lo tatou Malo. E ta uma ina ia vaai uma ia itu ina ia lelei uma le tamaoaiga i totonu o lo tatou atunuu. O lea la ua matau atu, tele ia o le pau lea e pau ai, tupe ia o lo o faamatuu i totonu o pisinisi. Ao lea foi sa tapena e le Faigamalo talu ai, ia le Phase 3 o le stimulus package, e tele ia o tupe e toe ave ai tupe i le aufaipisinisi. Ia ae o lea ua matau, ia ua tele le pau ua ave i ai e le tatou Faigamalo o tulai mai nei i tatou aufaipisinisi.

Ia o lea foi ua matau o le faaupuga lea i atinae o itumalo ma nuu. Ua leva foi ona faataoto tulaga ia. E i ai mo mea o... ua uma foi ona tatala ia mea o development plans a itumalo. O lea la ua faagasolo foi e faatino lea ua vaai atu ua tuu mai foi i i le tulaga o le atinae o... O i lea na ou mafaufau atonu... aua o le mea moni lava lau Afioga e le mafai ona ave foi i lalo lou manatu i le tai miliona lea. Leaga o la e fesiligia mai foi e lo matou itumalo. E lelei foi le faalogologo mai o lo matou itumalo o fai atu sau tala, o lea e tau faamanino mai e le Faigamalo, e leai e le o se... ua atoa le tai miliona lea na folafola i le tulaga lea. Ia ou te vaai atu e ese le tulaga lea e tau agai mai ai, ia o lea ua foliga mai e le \$51 miliona, ae lea pe na o le \$11 miliona ea pei e tau faapena atu lau tau matau, ia o la e faafogafoga mai ia lou itumalo aua e lua nuu o lou itumalo sa agai atu ai le... ia Safata sa agai atu i ai ia le la itu o le Vaega Faaupufai, sa fai i Sataoa sa fai foi i Fausaga lo tou afifio atu ma faaali lo outou finagalo ao lumanai ia faigapalota. Ia o le mea lea na ala ai ona tau tuufesili mai ia tagata o le itumalo, ia e taua foi ia o latou lagona ma manatu e aumai i taimi na agai atu ai ia lo outou Vaega Faaupufai, ia a o lumanai ia faigapalota.

Ona oo mai lea o se faamatalaga i tulaga lea o mea foi ia e sau i totonu i i le leai o se tupe o lea e faaagaga e le Tala o le Tupe i le faatulagaga o Tulafono. E pei foi ona taua e isi sui usufono ia o tatou lea e i ai ia lo tatou Ofisa foi lea o le Toefuataina o tatou Tulafono. Ou te mitamita foi au ia i tama fanau e tulai mai, ua maua le poto atamai. O i foi i le Matagaluega lea la e i ai loa e maualuluga ia o latou faailoga la e i ai. Ua ave i ai ia lo tatou faatuatuga, ae lea pei e tau matau, e pei o lea o le a omai ia ni tagata ese e suesue ma toe tilotilo i a tatou Tulafono. Ou te talitonu o le matafaioi lea,



sefe foi nisi a tatou tupe e alu i ia mea. O na e i tou Afioga Afioga i le Palemia ma le Kapeneta, e faatonu ia le mea ua outou finagalo i ai. O lea e i ai ia tama fanau a lo tatou atunuu, mitamita lava le Samoa i le Samoa, faaeaina o tama fanau, tatou faaeaina tama fanau a lo tatou atunuu.

O le siosiomaga lea e taua mai o le puipua o le siosiomaga. O lea foi e taua ua ova ma le 2 miliona ia tulaga o laau toto ia. O laau ia o laau toto i totonu lava o le tatou atunuu, ova ma le 2 miliona laau toto e le fou la le polokalame lea. O le polokalame ua leva ona faafoefoe ma vaai mamao foi i ai ia lo tatou Malo i le Paeaiga talu ai. Ia ae o lea la e matau atu, o lea e faaauau e le tatou Faigamalo. E pau lava lea, ia e pei o lea ua tele foi ia lea tupe ua ave i ai, ia aua e i ai le taimi ua amata ona tetele laau ia, ia e feaveai lava e manufelelei ia taimi e fua ai ia laau nei, ia ma toe toto ai ma toe ola ai lava laau o le togavao. Ia o lona uiga, ia e le tataua ona toe tele tele i ai ni tupe e alu i ai, ia ae pei e faapena lo matou lagona i tulaga o le siosiomaga.

Ona oo mai lea o le matou, i le mea foi lea o le faamama avega, faafetai tele lava. Faafetai o lea ua matau atu, o lea e faaupu mai o le a pau ia le eletise. O lau tatalo i lau Afioga i le Minisita o Tupe, o le a le umi e pau ai ia le pau lea? Pe o le a aveaveai atu ai lava aua e pei ona... o la matou foi matau, o faalapotopotoga ia e i ai le taimi e toe tapa ai i le Malo. E oo foi i le taimi e faaleleia ai masini ma tulaga faapena, ne i te i ua o tatou pau pau i lalo le tau o le eletise, ae toe tagi mai le.... ia aua e leai lava se isi mea e tagi i ai le Faalapotopotoga Tumaoti ia a le Malo. E faamoemoe mai i le Malo, ona toe avatu lea e le Malo o tupe e avatu i ai, ona sau lea o le tau o le eletise, ua matua i luga lava le tau o le eletise. Ia o lau fautuaga la, silasila totoa i ai lau Afioga i le Minisita aemaise foi ia le Minisita o Galuega.

O lea foi e matau i i o fea la e sau ai ia taligalu i le motu o Manono ma Apolima. Faafetai o lea ua afea mea ia o taligalu. O se tasi foi lea mea o le Paeaiga talu ai, ia o lea foi sa lagalaga e lenei itumalo ia o taligalu, ae lea ua matau, o lea ua afea i so tou finagalo ia mea ia o taligalu aua le puipua, le aia le siitia o le tai ia ma afaina ai ma aia ia le laueleele i tulaga ia o taligalu. Ia ou te talitonu foi, ia o lea sa ou maua i nai vaiaso talu ai na afio atu ai lau Afioga i le Palemia i nai au tafaoga ma malologa i lo matou nuu o le matou itumalo, le nuu tonu lava lea na ou talosaga ai i mea ia o taligalu. E moi lava o Sataoa ma Saanapu, aua o nuu ia... o le mea foi lea e taua le faamamafa atu, e fiafia o lea e leai ni a tatou turisi foi ia mai fafo, ae o lea ua turisi lava tatou i totonu o lo tatou atunuu. A tatou puipua la ia mataaga nei ma turisi e agai atu, ia o le mea lenei na ala ai ona faataua i sou manatu, i le tulaga o mea ia o le taligalu. Ia ou te talitonu o lea o le a tuu i totonu e lau Afioga i lenei Paeaiga e faatino ai ia taligalu o lenei itumalo.

E matu foi, o lea foi e matau i i o lea foi e i ai ia le faaaogaina o mea ia o tekonolosi, o lea foi e tau matau atu, e tele foi ia o se vaegatupe lea e ave i ai. E taua, taua mo aoaoga a tatou aua o lea e ave i ai le faamuamua a lo tatou Malo. Ae ua leva foi ona i ai mea ia o school net, mea tulaga faapena, e le

mafai ona toe asiasi i ai ia lo tatou Malo aua o auaunaga lava e tasi. O tulaga o initaneti, o mea lava na e toe silasila i ai ae o lea e matau atu, ia e pei lava ua maoae se tupe e ave i ai i lea mea i tulaga o mea o initaneti i totonu o aoga. E tuu atu ai se fautuaga i lau Afioga i le Fofoga Fetalai. O lea foi e taua i i le...

**Tofa Hon Olo Fiti Afoa Vaai:** Lau Afioga i le Fofoga Fetalai, e na o si mea lava lea e tau, e puupuu lava.

**FOFOGA FETALAI:** Ia, tuu atu i lau Afioga i le Minisita o Galuega.

**Tofa Hon Olo Fiti Afoa Vaai:** Aua o le Afioga foi i le sui usufono mamalu sa i ai i le Paeaiga sa tea nei. O le fesili tonu lava lea na ou fesili ai, i mea nei o school net. Sa molimauina lava le Minisita o Aoga i lena taimi, ua out of date. Na e silasila i ai na faapea lima o le Minisita o Aoga ua out of date. E faamanatu atu i lau Afioga ne i te i ua umi ai sau saunoaga.

**FOFOGA FETALAI:** Ia tulai mai le sui usufono mamalu.

**Afioga LEAANA RONNIE POSINI:** Faafetai i lau Afioga i le Fofoga Fetalai. Ia faafetai foi i le faauilavea a lau Afioga i le Minisita, ia afai foi ua out of date, ia faa update ifo ma le agaga faaaloalo.

**Susuga Hon Tuilaepa Fatialofa Auelua Sailele Malielegaoui:** Lau Afioga i le Fofoga Fetalai...

**FOFOGA FETALAI:** Ia se i tulai mai ia le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoui:** E tele le atinae lea, molimau ia le Palemia sa o matou galulue faatasi. Tele lava ia le atinae lea o le faaleleia o aoga i tua ma fesootaiga televavave. Ae pau lava ia le tulaga e tuai ai ona faatino mea nei, o le tulaga tau seleni. Ae o lea lava e faasolo, faasolo ia itu ia. O le isi lava itu faigata o mea nei, o totonu lava i aoga. Aua o lea na molimau nei, ina ua taofia ia fanau aoga ua le toe o i aoga ona o faamai, o i ina tonu lava lea na toe tau faaolaola ai ia fesootaiga nei televavave. Ma o le mea moni, ua atagia ai i ina le televave tele o le aoaoina o tamaiti, ae e fai si tuai o faiaoga. O le aoga la lena o le Koviti ma le taofiga lea na taofia ai, e pei ua uunaia ai loa ia faiaoga, e tataua ona faaleleia atili ia lo latou silafia o le faaoga o tekonolosi ia mo le aoaoina o fanau. A o lo o faagasolo pea ia le tatou polokalame lea ae e le o faapea ua out of date.

**FOFOGA FETALAI:** Ia faafetai, ia tulai mai le sui usufono mamalu e faaauau le saunoaga. O lea ua manino ia lea tulaga.

**Afioga LEANA RONNIE POSINI:** Ia faafetai i lau Afioga i le Fofoga Fetalai. Ae faaauau se matou manatu o lenei itumalo, ia e momoli foi le faamalo o lea e tau matau atu i le saunoaga a le Minisita o Tupe, i le tau faaitiitia o tau totogi i totonu o le tatou atunuu. O lea e tau matau atu e valu ia mea ia e tau faaitiitia ia tau. Faafetai tele foi i ia tulaga lo outou silasila foi e faamama ia le avega i totonu o lo tatou atunuu. Ia e manatua foi e faafetai o lea ua outou mulimulitaia, aua o le mea foi lea sa fai ai ia le tatou faamama avega i le Faigamalo talu ai, lea na faapau uma le tiute o meataumafa, meataumafa tuuaisea, ona e i ai le mafaufau o le Malo, e pei o mea ia e manaomia i aso uma, taeao aoauli afiafi, taeao aoauli afiafi. O lea na ala ai ona fai fuafuaga a lo tatou Malo talu ai, ave i ai le faamuamua i meataumafa, aua o le mea lea e manaomia lava e lo tatou soifuaga i taimi uma. Ae o lea ua matau, o lea ua outou fesosoani i isi tulaga e tau faapau i lalo ia tulaga o auaunaga i totonu o lo tatou atunuu.

Lau Afioga i le Minisita o Leoleo, e i ai lava lau faafesili lea e tau faafesili atu, aua o lau Afioga foi o le Loia o lau Afioga foi o le Faamasino. Lea ou te manatua lava le matou agai atu i Salafai i le taamilosaga lea na o matou o atu ai, ae poloka le auala, poloka le auala i Salelologa, faapa ai le laaumalosi. O lea foi na o matou agai atu ae matou toe liliu mai i Sasina. Na o matou faalogologo i saunoaga i le afioaga o Sasina lea sa tulai mai, lagona lava le faanoanoa. E le iloa po o le tu lea ma le aganuu, ao lau faalogologo, e pei o se tulaga ua faaoloataua le atunuu, ae faalogo i saunoaga lau Afioga, ana o matou taunuu atu i o e faaefuefu. E faaefuefu o lona uiga, e matautia e uma ona fasioti ia ave ifo toe susunu. E le o se tulaga lelei lea i le matou...

**FOFOGA FETALAI:** I le manatu...

**Afioga Hon Laauli Leuatea Polataivao Fosi:** Lau Afioga i le Fofoga Fetalai...

**FOFOGA FETALAI:** Ia saunoa mai le Minisita o Faatoaga ma Faigafaiva..

**Afioga Hon Laauli Leuatea Polataivao Fosi:** Ma lou faaaloalo, ioe sa manatu lava, o mataupu ia o lea ua i luga o le Tulafono. Ae a tatou talatala nei le aso lea, ia ona felefele loa lea o le mataupu. Ae e fai foi o lo outou saunoa mai, ae o lo matou foi taumafai atu. O lea na o tatou o e tausii le filemu po o fea e taoto ai le filemu. Na ua outou silafia le aso, e le faigofie. O lona na uma foi ona aumai le tofa ma le faautautaga a le motu, aua tou te o atu. Ia ae fai lava. Aua la le tau le pua ma lafo mai, leaga na muamua faaoololomaau le motu.

O le ala lea lau Afioga i le sui usufono mamalu, aua le taua le tulaga lea, o la ua i lima o le Tulafono, o le ala lena. E feoloolo upu ia, i upu na lalafa i le itumalo ma au lea e tu atu. O le ala lea malie le sui usufono, aua tatou te toso i faamatalaga e tatou te oo ai e fai se finauga. O lau tatalo lena ma lou agaga faaaloalo.

**FOFOGA FETALAI:** Ia, faafetai, o le fesoasoani foi lea i le sui usufono mamalu. Ae o lea ua manino o lea ua i le Tulafono, e talitonu o lea ua lea toe i ai se mea e pule ai le Palemene o lea ua i lima o aao o le Tulafono, o la e foi e faatino ia le latou galuega. E le mafai foi ona nofoai le Minisita o Faatoaga ma Faigafaiva leaga o lea ua taua lona afioaga.

O le mea lea, ia o tatou o sui usufono mamalu o le atunuu tatou faataumamao foi ma ia tulaga leaga e le mafai foi ona tali ia afioaga i mea nei mataupu ua o tatou lagaina leaga ua i le Tulafono le mataupu. Ia ma le agaga faaaloalo, faaauau mai ia le saunoaga.

**Afioga LEANA RONNIE POSINI:** Faafetai tele i lau Afioga i le Fofoga Fetalai, leai o lea ua e saunoa. E ava tele atu i le Nofoa, ae leaga o upu na lafo e le taugamalie i o matou tagata. O lea foi ua saunoa le Minisita o Faatoaga, faanoanoa ia i saunoaga a lau Afioga i le Minisita. E faapea ia lo tatou vanonofo e aumai, e sa ona o matou o atu i le motu i Salafai? Ae o le a foi la sou finagalo ae faasa e Upolu ia Salafai ona omai i Upolu? O le aganuu lena a tatou, ae e le o se mea e faaolotaua ai tatou.

**Afioga Hon Laauli Leuatea Polataivao Fosi:** Lau Afioga i le sui usufono mamalu, ia o le tulaga lea sa ou manatu ai. Silasila lelei i faaupuga na lafo ia Fiamē ma au. O le a le faaupuga? Susunu ola, o a laia upu lea e taufaafegagai mai nei? E le o le mea lena na fai atu e taatia mea ia. Taatia mea ia o la ua i luma o le Tulafono.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai...

**FOFOGA FETALAI:** Ia, saunoa mai...

**Susuga Hon Tuilaepa Fatialofa Auelua Sailele Malielegaoi:** E i ai le taofi, o lea ua i le Tulafono ia le mataupu lena. E pau lava lea o le mea, e le i i ai ma se taofiga na sau mai i Salafai. O le faamaoniga o lea mea, o lea e matou te o atu e faaoga auala a le Malo, ou te le iloa lava pe ua pule faasoloatoa i auala o le Malo. Hon Laauli, e sese ia lea faaaliga na aumai nei.

**FOFOGA FETALAI:** Ia talitonu foi ua manino lea tulaga, ia ae pei foi ona faamalulu atu i le sui usufono mamalu, ia o lea ua i aao o le Tulafono e le tatau foi ona toe oo i ai se saunoaga. E manumanu foi i le tatou taimi aemaise foi o lea e faagasolo ia le tatou galuega, ae o la ua i aao o le Tulafono le mataupu.

O le mea lea ia ua toe tasi le minute o le sui usufono, faauma mai lau saunoaga.

**Afioga LEANA RONNIE POSINI:** Lau Afioga i le Fofoga Fetalai...

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, ia ona o le tele foi o faauilavea mai i le la itu, *ou te faatuina sina 5 minute e faamaea ai le saunoaga a le sui usufono.*

*Faaluaina e le sui usufono o Anoamaa Sisifo ma le sui usufono o Vaimauga Nu.3.*

**FOFOGA FETALAI:** Ia, o lea foi e... ou te iloa e lava tele lava i le minute e tasi lea e tuu atu. Se o tatou e faapena, o lea lava e tatou te fesutai i luga o le tatou galuega, ae talitonu faauma maia. O na lava e... ou te iloa e lava nai minute na e fesoasoani atu ai i le sui usufono.

**Afioga LEANA RONNIE POSINI:** Ia faafetai tele i lau Afioga i le Fofoga Fetalai. O lau Afioga lava e tutasi lava faaiuga a lau Afioga. Ia ae faaauau sina matou tala e faauma ai ia tapenaga o lenei itumalo.

Ona oo lea o se matou tala i puipuiga o le Koviti, masalo o le puipuiga lenei e tatou te faafetai ai i le Atua. E oo mai lava i le aso o lo o malutia ia lo tatou atunuu. Ou te talitonu foi o lea ua savali i le lua tausaga o i ai le puipuiga o le Koviti i Samoa, mafua mai i se a? Mafua mai i Taitai, mafua mai i tatalo a le aifaigaluega. O le mea lea e malupuipua ia le faamai i totonu o le tatou atunuu.

E momoli ai le faafetai tele i le Komiti lea faapitoa, i lo outou lava onosaia ma le tuu mai o le tou fautuaga, e oo mai i le aso e le toe oo mai le faamai i totonu. Ae o lau tatalo, o lea e tau matau e tau tatala ia... aua e pau lava lea o le mea e sao mai ai le faamai i totonu o le tatou atunuu o le tatala o tuaoi ia. Aua foi ne i o tatou manatu e tata ia o tatou manatu i tamaoaiga ma le e toe maua lava ia le tamaoaiga. Ae a oo mai faamai ma o tatou vaai atu ua maliliu ia o tatou tagata, matua leai lava se mea e mafai. O lea e tatalo atu ai i lo tatou Faigamalo, silasila i le soifua o tagatanuu.

E le toe fia oo foi Samoa i le 1918, na oo mai ai ia le faamai oti. E tatalo atu ai ia malupuipua, maua foi le avanoa o lea e afio mai ia le Minisita o Falemai, ou te le iloa po o le a le mea ua tau faagesegese laitiiti ai, ua uma

uma lava. O lea ua ou matau e toe lava o le fauina o le falemai o lo matou itumalo i Saanapu, ia o le tapenapenaga mamao a le tatou Malo.

Ona fai lea o se tala o lea e tau matau sa faalele i luga o le ea ia mea ia o galuega faavaitaimi, ia ae o lea faafetai ua toe tatala ia le tou finagalo. Faafetai i lo matou tuualalo atu, ia ae o lea ua outou tali mai, o le a faaauau lava ia galuega faavaitaimi. O lea ua outou silasila i le tele o le tamaoaiga aemaise o matou i tua, siitia o nai aiga. O latou tamaoaiga ua tele, ua maua taavale fou, faafouina o latou fale, fesoasoani i o latou faatoaga, faafetai o lea ua toe tafa ia outou finagalo e toe faaauau ia galuega faavaitaimi.

Ia ona oo mai lea o se tala i le vaalele, lau Afioga i le Minisita o Vaalele, o lau lava tatalo, aumai ia le tatou vaalele. Ou te nofo lava ma ou matau i le taimi na leai ai ia se tatou vaalele. Ou alu atu e totogi lou pasese ou te alu i Niu Sila, toeitiiti lava \$4,000 le totogi le alu ma le sau. Mafua i se a? Leaga e leai ia se tatou vaalele. Ia ae o le taimi na i ai ia le tatou vaalele, na oo i lalo o le \$700 le totogi le alu ma le sau.

Ou te talitonu foi o le silasila i lene itu, e faapea e tupu ai aitalafu. E i ai taimi o tatou matafaioi lene a lo tatou Malo. E subsidise e tatou ia mea faapena. Ae o le aoga i totonu o lo tatou atunuu lautele, ou te fai atu lava au o le tele o faamanuiaga e maua ai. E le gata i le mafai e nai o tatou tagata ia le asiasi i Niu Sila, ia ao le asiasi mai foi o tatou tagata e asiasi mai, pau le tau o le pasese lenei. E talitonu mai lau Afioga i le Minisita, a le aumaia ia le tatou vaalele, ou te talitonu o le taimi lava e toe tatala ai, e toe oo i luga o le \$3,000 ia le pasese. Ae o le faamama avega lea a lo tatou atunuu aua a tatala ia femalagaiga, tele ia o penefiti a lo tatou atunuu e maua ai. Ae o le tatou Malo, e kava kava atu e le Malo ia nai aitalafu na.

Ia o lea foi ou te tau maua faapea o le vaega lea o le Fiji Airways, o la e oo i le \$300 miliona la e totogi i le masina le gau la e gau ai. Ae a? E le o faamamuluina lava e Fiti ia le latou Kamupani Vaalele. O la ua o latou iloa ia le aoga o le vaalele. Kamupani Vaalele, e tele ia o latou vaalele la e i ai. Ae o tatou, e tasi lava ia si vaalele lea e auauna mo tatou. O lea e tatalo atu ai i lau Afioga i le Minisita, taoto atu ia le tatou vaalele.

Ou oo mai lea i le Tala o le Tupe lea e tau matau, o lea o le a faamaoti, ua i ai le fuafuaga a lo tatou Malo e faamaoti ia vageatupe e tuumaoti lava i le Vaega o le Faamasinoga, ia aemaise foi ia le Ofisa o le Fono. Ou te manatu i le tulaga lea, masalo e oo lava ia Niu Sila ma Ausetalia e le o faia le mea lea. Ae o lea ua ou vaai atu e pei o le a fai e tatou. Ou te iloa e pei lava o Amerika lea e latou te faia. E mafua ona o latou faia ona o le tele o Ofisa o Matagaluega o Faamasinoga o la i totonu e tele le atunuu. Ou te iloa foi ua talafeagai ai.

Ao le lotolotoi lea i totonu e aputiputi faalelei ia tatou tupe mai i le ato e tasi, e lelei ona faamaopoopo lelei. Ae a oo foi ina tuu atu faapea, ia e i ai foi taimi e manaomia ai foi nisi tagata faigaluega, e latou te faafoefoe ia tupe ma tulaga faapena, se i silasila totoa ifo i ai le Afioga i le Minisita.

**FOFOGA FETALAI:** Ia faaiu maia le saunoaga a le sui usufono mamalu.

**Afioga LEANA RONNIE POSINI:** Ia ona oo mai lea le saunoaga i le sueina o tulaga tau tupe, ia e le tau matau e pei e foliga mai e tau aumai foi e faamatuu nisi vaegatupe aua tulaga o le omai o tagata e toe suesueina mea ia. Ao le taimi nei, o lea e up to date uma ia tatou Annual Reports a Matagaluega. E oo foi i tatou Audit Reports ia e aumai, leai ma se mea o faaletonu. O lea e omai lava i taimi uma taimi uma o lea e oo mai lava i le taimi nei o lea e i ai. Ae o le autilo foi o le tau aumai o nisi tagata o le tatou atunuu o lea e i ai tamafanau o lea e mananao mai i ai isi atunuu, e o atu e faaitaitai polokalame ma le systema lea e fai e Samoa. O le tuualalo lea i lau Afioga i le Minisita o tupe, o tulaga ia.

O le isi mea o lea e taua, ou te le o, o tologi o avetaavale ia a a outou afioga. O lau matau, o le tele o le siitaga i luga. Ua ova ai ma le tai \$30,000. A o tamaiti ia e iu mai sikoalasipi tai fa (4) tausaga. O lea e amata i le \$22,000.

**FOFOGA FETALAI:** Ua maea le taimi o le sui usufono.

**Afioga LEANA RONNIE POSINI:** E faamalulu atu i lau afioga, o lea o le a tau faamaea atu alu atu ai loa i le itumalo.

**FOFOGA FETALAI:** Ua tele le alofa atu ma le fesoasoani atu, faauma mai loa le saunoaga.

**Afioga LEANA RONNIE POSINI:** O le a faauma atu nai mataupu ia faamolemole. O nai sui faipule ia e toafitu (7) lea e le i faatautoina.

**FOFOGA FETALAI:** O lea ua faamau.

**Afioga LEANA RONNIE POSINI:** Alofa ifo i ai lau afioga, o se taimi muamua lea ua tulai mai ai tulaga faapea. E ave foi lau faamalo i ....

**Afioga Hon Fiamē Naomi Mataafa:** Lau Afioga i le Fofoga Fetalai, o se mea e fia malamalama ai i sui faipule ia po o sui e toafitu ia ua faaleaogaina o latou Nofoa. O lea na ou maua, o le talosaga lea na ave i le faamasinoga, ina ia faatautoina le Vaega Faaupufai. Na aveeseina lava e le Vaega Faaupufai le toafitu (7) lea.

O le a la le mea lea e saunoa mai ai le sui usufono?

**FOFOGA FETALAI:** O le ala foi lena o lea sa tau faapupula atu ai i le saunoaga a le sui. O lea ua taatia i Paga le tulaga lea, ona o lea ua i ai le faaiuga a le faamasinoga. Ua tele lava le mau mea ona ua e lagalaga ia maumea.

Faauma mai loa.

**Afioga LEAANA RONNIE POSINI:** Faafetai tele i lau Afioga i le Fofoga Fetalai, e le toe faasilia foi se matou tala. E pei lava ona fai atu, o lau afioga e tutasi. E leai se isi e seua le puletutasi a lau afioga i totonu o le tatou Maota.

Ona faauma atu ai lea o se matou tala, oo atu ai i le matou itumalo o Safata Nu 1. Le paia ai Satunumafono o le Aiga Malosi.

Le paia i le matou nuu i Lotofaga, le afifio o Ama ma Afoa, afio Lesa ma Leusoalii, ma le mamalu ia Satunumafono le fetalaiga i le igoa matua ia Saseve ma le Nofoafaanao.

Le paia foi o le matou nuu i Sataoa, afio o Taoa ma Afemata, Seiuli ma le Maopu ma le tauso. Lau fetalaiga Faleafulugogo, le mamalu o le faletolu.

O le matou afioaga foi i Salamumu, le afifio o alii e lua, afifio o sa Peseta, afio Maopu lau fetalaiga Saleaula.

Ae a lo matou nuu i Saanapu, le afio o Anapu, le afio o Mulitalo ma le aiga sa Mulitalo. Afio Mati ma le aiga sa Mati. Afio foi Leaana ma le aiga sa Leaana. Afifio Seve ma Tafafunai, afio le Maopu o le Tuiaana o Tuigamala, le igoa matua le fetalaiga ia Tuigaleava, le mamalu o le nofoaituaiga i lau fetalaiga Lesa, lau fetalaiga Lauvi ma lau fetalaiga Lalogafau. Le paia i aiga e lua. Lau fetalalaiga Alo ma lau fetalaiga Vole. Aemaise le mamalu o lo tatou itumalo.

E avatu ai le faamalo ma le faafetai, aemaise foi auauna a le Atua o lo o tapuaia ma faanonomanu aua ni manuia o lo matou itumalo. E momoli atu ai le agaga faafetai tele. E faafetai i lo outou toe amanaia o lou faatauva, e toe tauaveina le Nofoa o le tatou itumalo.

O le tatalo e fia ola auauna lava mo lo tatou itumalo e tautua i Upufai o Malo aua se manuia o lo tatou itumalo. O lea e momoli atu ai le agaga faafetai, o lea ua toa foi le tulaga o Upufai o le Palemene, e i ai foi se taimi mau se tatou feiloaiga.

O le matou tala lea, manuia tele le afioga i le Fofoga Fetalai, manuia le Maota o Samoa. Soifua.

*Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Safata Nu 1.*

**FOFOGA FETALAI:** Ua faamalo saunoa, ou te talitonu lava ua maea lelei lava lau tapenaga. O le mea lea, malo saunoa, faafetai o lea ua faafogaafoga mai le Maota aemaise foi si ou itumalo. Aemaise o lea lava e te faasoa lautele aua le tamaoaiga o le atunuu. Malo lava le sausaunoa faafetai faasoa.

O lea e avanoa lo tatou Maota mo se isi sui usufono.



O lea e matau atu o lea e fou mai le sa, o se tasi foi o sui sinia o le Palemene. O le sui mamalu mai Vaimauga Nu 2.

Lou avanoa lenei le sui mamalu.

**Tofa LENATAI VICTOR FAAFOI TAMAPUA (Vaimauga 2):** E faamalo faafetai i lau Afioga le Fofoga Fetalai, e tusa ai foi ma le avanoa.

Ou te faatalofa atu i le paia maualuga le mamalu tele o lenei Maota, si ou alofa talofa lava.

E talitonu o lea ua tu maualuga lenei taeao na liugalua. I le afio o lau Afioga i le Fofoga Fetalai, i le afio o lau Afioga i le Palemia, sui Palemia ma le nofo a Minisita o le Kapeneta, tainane foi afioga a sui Minisita. Afio foi le Taitai le sui Taitai ma lenei Itu o le Maota.

O lou tulai mai i le foe lau Afioga i le Fofoga Fetalai ma e seei i le Nofoa pule o lenei Maota. Se ua faamalo le galue, faamalo tautua, faamalo foi fai o le faiva. Ia faamanuia tele le Atua i lou tulai mai, e fai ma too taumua o le sa o le Palemene o Samoa.

Ou te faafetai atu i lau Afioga i le Fofoga Fetalai i lenei avanoa maualuga ua e tuuina mai, e avatu ai foi se sao o lenei itumalo, i tualumaga i le talanoaina i le Tala Faatatau o le tupe 2021/2022 e pei ona i luga o le Laulau a Fono nei.

Ae muamua ona ou faatulou ma ou faatalofa atu i le tapuaiga paia, i lau Afioga i Le Ao mamalu o le Malo o Samoa, lau afioga i le Tuiaana ma lau masiofo.

Le tapuaiga mamalu a lau Afioga i le Sui o le Fono a Sui Tofia ma lou faletua.

Lau Afioga i le Faamasino sili faapea le vasega o Faamasinoga. Ou te faatulou ma ou faatalofa atu foi, i le mamalu maualuga le nofo a Minisita. O le sakaramaka paia, o le aufaigaluega paia a le Atua, o lo o faatunapaulia ma faafalelemalu i nuu ma afioaga. Ua faamalo faafetai ia outou tatalo, ma la outou faanonogamanu aua se manuia o Samoa ma lana Faigamalo.

Ou te faatulou ma ou faatalofa atu foi i le paia ma le mamalu o si o tatou Atunuu o Samoa, tainane foi le tapuaiga o Samoa i Sasae, i ona tulaga faalupe. Aua o paia mai le vavau e oo i le faavavau.

Ae o le a sunui tonu lau o le fo, e faapitoaugafa se leo o le auauna faatauvaa, aua e faigata le tapuaiga a si ou itumalo pele o Vaimuga Nu 2.

I le afio o lau Afioga, i le matua ia Tofaeono Iupati faapea Tofaeono Vui Faatali. Afio lau Afioga Asi Tuiataga Semisi, afio lau Afioga Asi Sagagauatasi. Afio lau Afioga Asi Leuluaialii. Tainane foi o le afio i le afioga ia Patu Falefatu ma Patu Sola Siao. Alalatai i lau o Lenatai Tamapua ma Manogiamanu, ma le mamalu o le nofoaituaiga ia Fuata.

O paia faataotooto na o si o tatou itumalo. Aua le paia maualuga i susuga i faafeagaiga ma le aufaigaluega a le Atua. I le nofo a Fataloa o le Talalelei, le paia ma le mamalu o tupu ma ee, o failauga ma ponao. O saoa ma

aualuma, faletua ma tausi, o aumaga ma ava aumaga, e oo lava i le tupulaga talavou, ma le mamalu tele o le aupalota.

E avatu foi le faamalo faapitoa i sui tauva sa faapena ona fai i ai le filifiliga a si o tatou itumalo. I lau Afioga Tofaeono Iupati, faapea Tamaleta Taiman, malo le fai o le faiva faatamalii.

Lau Afioga i le Fofoga Fetalai, mai lava i le taeao analeila, o lea sa matauina sa faapena ona taua, o se taimi auiliili ai le tatou Tala o le tupe. Atonu o se vaega o le a ou taumafai e faaleo atu e lou nei sui usufono, e na o se vaega e taumafai e faaataata. Ae o nisi o vaega, o le a faapena ona faaoga i ai le 15 minute o lea o le a faaagaaga lau afioga pe oo i le taimi lea.

Ae fia amata se faamatalaga, e momoli atu le agaga faafetai i le Minisita o Tupe, tainane foi le sui Minisita ma le Matagaluega, ma le galuega fita sa feagai ai. E tuufaatasia le Tala Faatatau o le tupe 2021/2022. Ae o nai vaega ia, e fia avatu ai se fesili po o se tuualalo a o faagasolo le faatalanoaina o le Tala Faatatau o le tupe.

I le tatou Matagaluega, o lo o matauina o lo o i ai ia le seleni lea e \$250,000 ina ia fai ai lipoti faaletausaga i tatou SOEs e pei ona i ai. O se manatu vaivai a lou nei sui sa galue foi i le tatou Malo i nisi o tausaga, e i ai le talitonuga o lo o i ai i totonu o Matagaluega ma Faalapotopotoga, e o lo o ua avatu faapitoa latou te vaaia le galuega lea. E avatu ai foi se tuualalo, a toe faaoga lea seleni e toe sue mai se tagata mai tua, ae le faaoga.

Aua o lea e matauina o le process lava lea o lea e i ai tatou. A uma le tala faaletupe ia Iuni, o le 3 i le 6 masina e tapena mai e le Matagaluega. E oo atu ia Tesema ua faapena ona faaulu mai i le Palemene ia lipoti ia faaletausaga o Matagaluega ma Faalapotopotoga. E i ai foi le talitonuga o lea e update uma lava. O lea e le i oo tatou ia Tesema, e talitonu o le masina foi lea, o le a faapena ona faaoo mai ai ia lipoti ia faaletausaga o Matagaluega ma Faalapotopotoga.

O se tuualalo lea, atonu e aoga lea tupe e avatu e faaoga i lalo o se isi Matagaluega, i lo le toe ave toe duplicate ai, ma o se tupe faaopoopo o le a toe faaalu, ae o lo o i ai tagata o la ua faafaigaluega latou te faia lea faamoemoe. O se tuualalo lea.

O le isi vaega lau Afioga, o lea e matau atu ou te le iloa po o i ai se faaletonu i le tatou accounting system o lo o i ai. O lea e sau i i, o lo o i ai foi le tupe o lo o faaagaaga, ina ia fai ai se full forensic accounting assessment. O le faa-Peretania lea, o lea e faaagaga i ai le \$250,000, e tali tutusa la ma le mea lea sa avatu i lipoti faaletausaga.

O lo o i ai foi tagata o lo o i ai le agavaa i totonu o Matagaluega totonu o Faalapotopotoga latou te faatino ai ia galuega. E pei lava si popolega, o lea o le a toe alu le isi tupe faaopoopo a o lea e sue ni tupe e faaatoa ai tupe ia e tau soo o le miliona tala. Ae pei o le vaega lea e avatu ai se tuualalo e faaoga tatou tagata o lo o i ai. O lo o i ai ia principle Accountant, o le vaega ACEO.

E le gata i lea, o lou malamalama o lo o i ai, e tofu foi Matagaluega ma Faalapotopotoga ma latou internal auditor.

O se taimi i le tausaga e faatulagaina, e o atu le ofisa suetusi latou te faia foi lea galuega. Atonu o i latou ia o la e malamalama i latou lava Matagaluega, atonu foi o le vaega foi lea, e sili atu le tomai o lo o i ai e faatinoa lea galuega. I le toe aassina o lea vaega, ae o lea e totogi le totogi o lea sa avatu ai o latou totogi, e leai se tupe e faaopoopo e toe alu ai.

O se tuualalo lea i le tatou vaega lea, i lalo o Matagaluega o tupe. O lea e matau foi o le anavatau po o le faamuamua o lo o faapena ona faavae ai le tatou tala o le tupe. Ia siitia le soifua manuia o tagata uma o le Atunuu.

E momoli atu le agaga faafetai i lau Afioga i le Soifua Maloloina ae faapea foi le Minisita Lagolago e faapea foi le Palemia ma le Kapeneta, ma lenei Itu o le Malu. I aso ia e lua ua faaagaga e fai ai le tatou tui puipui. Malo faafetai, faafetai mo la outou vaai mamao i le tulaga e tatau ona i ai. O lea e tatalo atu foi i le itumalo, nuu ma le afioaga o Vaimauga Nu 2, ia faaoga lelei le avanoa lea. Ia fia lou tui puipui. E pei ona faafofoga mai ma faalogologo mai i nisi o sui usufono, ia o lea e matau mai ua oo mai i Tutuila le faamai. Ia ae tatou taumafai e puipui na i o tatou aiga aemaise o tatou nuu ma afioaga aemaise o le tatou Atunuu o Samoa.

E fia oo atu se faamatalaga i le tulaga lea lau Afioga i le Fofoga Fetalai, e tele lava saunoaga o lea e taua ai le tatou miliona tala lea, a o lea e matau atu o lea ua tuu mai i lalo o le \$200,000 ma aiaiga lea ua i ai i talosaga faapoloketi. E matau atu foi ina nei ou sese, o lea i lalo o le Matagaluega o Tina ma Tamaitai.

Lau Afioga i le Minisita, o se tasi foi ua leva ona tautua i lalo o le Malo aemaise o le tatou Atunuu o Samoa. Ia malo faafetai, malo finau. O lea e matau atu i le lauga lea sa aumai e le Afioga i le Minisita o tupe, e pei o lea o le a toe faalelei ia nuu ma afioaga ma tulaga faapea, aua foi polokalame mo le agai i luma.

Ae e avatu foi le tuualalo o le Paeaiga lea ua tea atu, o lea sa faatu ai a tatou komiti faaitumalo, po o komiti o atinae o itumalo taitasi po o le District Development Committee.

O le 2017 sa faavae ai ma faatu ai le komiti a si o matou itumalo i Vaimauga. E ese le manaia, e mai lava i lenei taimi, ua tolu (3) poloketi ua mafai ona fai i totonu o le itumalo i lalo o le fuafuaga lea ua maea ona faataatia.

O lenei komiti e taitaifono ai le faipule, o sui mamalu uma, o sui o nuu, o sui pulenuu, o sui tamaitai, o i latou uma ia, e i ai i totonu o le komiti lea. E i ai la se manatu o lou nei tagata, e pei lava o le komiti tonu lava lea, e tatau ona faamatuu atu ai le \$200,000 lea. O i latou ia, e sili atu lo latou malamalama i o latou nuu, ma o latou afioaga i ni atinae aua se manuia o itumalo. O se tuualalo lea e avatu i lau Afioga i le Minisita i le tulaga lea. Aua a faapea o lenei o le a taatia atu i ina, omai matou talosaga, ne i uma

ifo...E 10 nuu i totonu o si o matou itumalo, ne i tele le isi nuu, ae laititi le isi nuu i totonu o le tausaga faale-tupe. O se tuualalo lea e avatu ai foi i lau afioga.

Ae manaia foi po o le a se finagalo e pei ona taua ia lipoti faale-tausaga, e manaia ae avatu foi i ina e faafeololo atu ai se tupe e talosaga atu ai itumalo, e fai ai a latou poloketi.

Manuia lou tulai mai lau Afioga i le Minisita o Tina ma Tamaitai.

O lo o i ai foi se vaega o tupe, o lea e matau atu foi lau Afioga i le Fofoga Fetalai, i le toe iloilo lea o le tatou Faavae. O le tuualalo foi e avatu, o lo o i ai a tatou Matagaluega o lo o mafai ona latou faatinoina lea galuega. Ou te le o iloa pe o le a sau se isi tagata mai fafo po o se isi tagata, e le o malamalama e le o i ai le tausiga. Aua o lou talitonuga o lea ua tulai mai le tatou Loia Sili, o ia lea na te tausia le tatou faavae. E lagolago atu ai ma lo tatou Law Reform ma le Ofisa o le Fono, latou te galulue i lea vaega. A o le totogi, o la e totogi latou, e le toe tau aumaia se tupe, e toe faaopopo i luga. A o le latou galuega o le latou matafaioi o lea ua aumai ai latou te galulue ai, e pei ona fai ai le latou tautoga.

Lau Afioga e tele nisi vaega e fia oo atu i ai se faamatalaga, aua o lea ou te...ua ou fiafia lava ina ua e fai mai e maua avanoa tailua, pe 15 minute, o le a toe taumafai atu ai i se taimi.

A o le vaega mulimuli e fia avatu lea i le Minisita o Fesootaiga. O se tasi foi o ou uso sa ma aoga faatasi. O se tama lelei e tumu i le faamaoni ma le amiotonu, ae ese le faalogogata i faiaoga. Faamalo le finau, malo i lou tulai mai ua avea oe ma Minisita, o taua uma lena. Ae pau o lea, o si au tuualalo, atonu o lena lua te sootauau ma le Minisita o Aoga. O le \$2 miliona lea mo le faaleleia mo le faaogaina o tekonolosi o internet mo aoga. E talitonu o lo o i ai le tofa i lau Afioga i tulaga masani.

O lo o tele lava a tatou providers o lo o i ai. Tatala le avanoa, latou te talosaga mai ai, i lea vaega aua le fesootaiga o aoga. E leaga e ese le taua o le vaega lea. Sa ou galue foi i le Ofisa o Aoga, ua leva foi ona tau tilotilo se vaega faapea. O le faigata e pei ona i ai le school census ma mea faapena, a o se vaega taua lea.

A o lau talosaga ma lau tuualalo faamolemole, o lo o i ai foi si vaega o lo o faia lea auaunaga, o lo o i ai foi lo latou tomai, e manaia ae tatala i ai le avanoa mo i latou e ta talosaga uma ai. Ae aua ne i tatou te tilotilo tasi, i se isi latou te faatinoina lea vaega. O se tatalo lea i lau Afioga i le Minisita.

Lau Afioga i le Fofoga Fetalai, e momoli atu le agaga faafetai, mo le avanoa ua e tuuina mai i lou nei tagata.

E faafetai foi i si ou itumalo, i le toe filifilia foi o lou nei tagata e fai ma o latou leo. Ia tapuai maia, o se taumafaiga foi o le a taumafai i ai lo outou sui usufono, i lena foi Paeaiga.

Ia agalelei le Atua i tualumaga o lo o totoe, ia agalelei i lau Afioga i le Fofoga Fetalai, Palemia ma le nofoa Minisita o lena Itu o le Malu, tainane o

le Taitai ma le sui Taitai o lenei Itu ma lenei vaega, ia agalelei le Atua aua se manuia mo Samoa. Soifua ma faafetai.

*Na faaalua le agaga fiafia o le Maota i le patipati o latou aao i le maea ai o le Saunoaga a le sui usufono mo Vaimauga 2.*

**FOFOGA FETALAI:** Ua faamalo saunoa, pau foi le tanoa i lau Afioga i le sui mamalu mo Vaimauga 2, o se tasi foi o sui matua i le Palemene. Ua leva foi ona e tautua i le Atunuu e ala i le Palemene. E talitonu foi ua manaia foi le fautuaga ua tuuina mai i le Faigamalo. Aua lava le agai i luma, e le gata i lou itumalo ae faapena foi i le atunuu. O le mea lea, faamalo faafetai faasoa. E faafetai foi mo le fesoasoani, o le tatou galuega e tauave faatasi. O le mea lea, faamanuia le Atua i tofiga, tapuai foi si ou itumalo, o lea foi ua faafofoga mai, o lea ua e laga le tele o nisi mea taua, aemaise foi o le fesoasoani i le Tala o le Tupe aua lava galuega fai i si ou itumalo. O le mea lea, malo faafetai saunoa.

Ou te iloa o le avanoa lenei mo se tasi o sui usufono, o lea lava e lava lo tatou taimi.

Tulai mai lau Afioga i le Palemia.

**Afioga Hon Fiamē Naomi Mataafa:** Lau Afioga i le Fofoga Fetalai, ua sauni atu foi le itu a le Malo e tali, pe a faapea ua malolo mai lenei Itu o le Malo.

**FOFOGA FETALAI:** O lea lava e lava le taimi e tuuina atu. O lea lava ua leva ona tapena le Malo e fia tali le Tala o le tupe. Ae o lo o maua lava le avanoa.

O lea e matau atu ua tulai mai se tasi foi o sui usufono sinia, o Vaimauga Nu 1, ia Sulamanaia Fetaiai Tauiliili Tuivasa. O le avanoa lenei i le sui mamalu.

**Afioga SULAMANAIA FETAIAI TAUILIILI TUIVASA (Vaimauga 1):** E faafetai mo le avanoa i lau Afioga i le Fofoga Fetalai, sa i ai lava le manatu e le o le ituaso lenei e lauga ai le Vaimauga. Sa ou manao ou te tumuli ai, ae o le itumalo lenei e tumu i le fealofani. O lea ua saunoa foi se tasi o uso o lenei itumalo, o lea o le a sosoo atu ai lava maua.

Lau Afioga i le Fofoga Fetalai, a o le i faia se sao o lenei itumalo, e muamua ona faafetai atu ma ofoalofa atu i lenei tala na atoa i le afio o lau Afioga i le Minisita, le Afioga i le Palemia, o le afioga i le Sao Faapito o le sao Papa o le sao Falenaoti, lau afioga Fiamē Naomi. E faatalofa atu foi i le afio a lau afioga i le sui Palemia, lau Afioga Tuala Ponifasio. Ae a le afifio o alii ma tamaitai o Minisita o le Kapeneta. Afifio foi afioga i Minisita Lagolago.

Malo le tau, malo le sailimalo, o lea ua outou tulai mai e taitaina le sa o Samoa, faafetai le to'a.

E faatalofa atu foi i le afio a lau Afioga i le Fofoga Fetalai, aemaise o le sui Fofoga Fetalai. O ou mama na, faafetai i le tofiga a le Atua ua tofia ai oe ma le lagolago atu a le sui Fofoga Fetalai.

E faatalofa atu foi i le afio o le Taitai o lenei vaega. O le toelutaia foi o le Maota Fono a Samoa. Lau Afioga Tuilaepa Dr. Sailele Malielegaoi. Ua faamalo le alofa i le atunuu, faafetai i le taitaiga o le Malo i aso ua tuanai, i tausaga ua tuanai. O lea lava e faatotoe oe e le Atua i lenei Itu ua tatou i ai.

E faapena foi le lagolagosua ma ofoalofa atu i lau Afioga i le sui Taitai, ae a le afifio o alii ma tamaitai o le Palemene a Samoa. Ua malo le tautua, malo mo lo outou valaauina na tofofi ai i tatou e le Atua.

E faatalofa atu foi i le Failautusi ma le Ofisa o le Fono. O outou o lo o tautuaina lenei Maota i le po ma le ao. Ia alo ane i outou faia alofilima aua le Maota Fono a Samoa.

E le mafai foi ona tuua le faatalofa atu i Ofisa Sili o Pulega o Matagaluega ma Faalapotopotoga Tumaoti a lo taou Malo. O outou o lo o lima ma vae i ai le Faigamalo. O matou e na o le 5 tausaga, a o outou o alo ma fanau a tupu o le atunuu, ia faapena ona tautuaina pea lo tatou Malo. Ua faamalo le galulue, faamalo le tautua i si o tatou Atunuu.

O le upu a le atunuu, e le mafai e le tufanua ona faatino le tautua, e na o le tupu lava. Ia malo, malo le tautuaina o si o tatou atunuu.

Ia faatalofa atu foi i le paia o lenei Maota i Ofisa Faasalalau i nusipepa o leitio, so o se vaega o lo o faasalalauina lenei Fonotaga i atunuu mamao ma totonu o si o tatou Atunuu. E tasi lenei vaega ua faapena ona misi pea i le tele o taimi. A o outou o lo o lipotiina atu i fafo mea e tutupu i si o tatou atunuu. O outou mama na.

E le mafai foi ona alu loa le lauga a lenei itumalo e le i faafeiloai atu ma ofoalofa atu i le tapuaiga a Le Ao Mamalu o le Malo. Lau Afioga i le Tuiaana Tuimalealiifano ma le masiofo, aua lau afioga i le Maposua.

E faatalofa atu foi i le afio o le Sui o le Fono a Sui Tofia ma le masiofo, afioga a Le Mamea Ropati.

E faatalofa foi ma ofoalofa atu lenei itumalo i le afio i le afioga i le Faamasino sili aemaise le Peresetene o le Faamasinoga o Fanua ma Suafa, ma le afifio o Afioga i Alii ma Tamaitai o Faamasinoga e lua (2). Malo mo la outou pitolaau, malo i la outou tautoga na tuuina atu i le Atua, e tautua ai Samoa e ala i lena vaega o lena Ituvai.

E le mafai foi ona tuua le tapuaiga a le Aufaigaluega a le Atua i so o se Fatafaitaulaga, o e o lo o nonomanu i le Atua e ala i le tulivae, anapopogi ma tatalo, aua se manuia o Samoa. A lea e oo mai lava i le itula lenei ma le afiafi lenei, e leai lava se talavale o faalogoina i totonu o Samoa. E ala i le faamai oti lea ua latalata mai. E faafetai i la outou tatalo, faafetai i la outou tapuaiga, o lo o malu ai Samoa.

E le mafai foi ona tuua i lalo se tapuaiga a Samoa, o Tama ma o latou Aiga o Aiga ma Tama, Usoga a Tumua ma Pule Ituau ma Alataua, Aiga i le Tai ma le Vaa o Fonoti.

Ae a le tapuaiga a lea Itu, le motu ia Tutuila i Sasae.

E faasilisili lava le manatu o lenei sui usufono, i le tapuaiga a si ou itumalo pele. Sa Vaimauga i Sasae, o lea ua Vaimauga 1. E mai lava i Fusi ma Fanuatanu afioaga e afio ai Leniu ma ona alo. O le Sao Faapito aua foi le Afioaga ia Leniu Vainiu Teo. Afifio foi ona alo aua Fuamatu ma Maposua, ae a le Afioaga i le Matua o Tofiga ia Taliulu, aemaise le faauluuluga o Salevalasi, le paia o le Aiga Salevalasi aemaise o lau fetalaiga Fuatimau o oulua ma Mauletaua fai mai o moa vinimua o le fale Tuamasaga, le nofo a ituaiga ma ituala e fia ma oe Tuisamanu.

Oo mai foi i le tapuaiga a si ou nuu o Letogo, afioaga o Tuliaupupu o le malae i Lalotea, o le malae o le faautugatagi a Tumua, e afio ai Tuliaupupu o le Fofoga o le Alataua, afio ai le Usoalii, le Teialii, matua ma alo o Malietoa, ae a lau fetalaiga Mauletaua ma le nofo a ituaiga ma oe Tuisamau, aemaise alo o Tuliaupupu.

E faapena foi i le tapuaiga a si ou nuu o Vailele, Niniva ma Punialavaa, aua le falefia aemaise le gataiala, aemaise oulua Tupuanai ma Lefau, le nofo a ituaiga ma oe Saleupolu.

Ae a le tapuaiga a si ou nuu i Fagalii, aua Pilioua, Fatitolo ma Falepouiva, Luamanuvae ma Tuisugaletaua o le Alaalatama, aemaise oulua Pulemagafa ma Leatitagaloa ma Puna o oulua na talia le tanoa aemaise le mamalu ia te oe Saleupolu.

Le aufaigaluega paia a si o tatou itumalo i so o se fatafaitaulaga, ia tapuai maia ma le manuia.

E le mafai foi ona faagaloina si ou pitonuu o Maugafiafia, ia o lea o le a fai so tatou sao aua le tamaoiga o si o tatou atunuu ua opea nei i le Maota.

E muamua ona ou momoli le agaga faafetai i lenei taeao ma le liugalua ua tatou i ai, e faamalieina lava lou loto i le upu lea o le Afioaga Paia a le Atua e ese lou fiafia i ai. A e tago nei e faitau pe a e oo i lou Maota, i le Ieremia lena e 33 a o lona fuaiupu la e 3, na o le pau lava lena, “Ia e valaau mai ia te au, ona ou tali atu ai lea ia te oe ma ou faaali atu ia te oe o mea tetele ma le faigata, o mea ua e le iloa.” E faapena se lagona o le sui usufono lenei. O le faigata ia o le taimi na asa mai ai lenei Paeaiga. Ae ou te faafetai lava i le Atua, o se taimi muamua lenei ua faigata ona omai ai e na tofofi e le atunuu e omai i o latou Nofoa i totonu o le Palemene lenei o Samoa. O le ala lena o lou fiafia i lenei 6 masina na nonomanu ai ina ia tuuina atu i le Atua le faamoemoe. A lea o se taeao fou, a lea ua oo mai lava i le taeao lenei e leai lava se mea o gase. O lou agaga faafetai lea i le Atua. O tofiga a le Atua ma mea na tuu e le Atua i lou tagata e toe ui mai ai, o lea ua oo mai i le taeao lenei.

Ae a silasila ma matau i le manatu po o le manulauti o le Tala o le Tupe lea ua opea nei i le Maota, o lou aiga, o ou tagatanuu, o lou atunuu ma lau aganuu ma le faa-kerisiano, o le tatou matafaioi faatasi lea. O fea o i ai le aiga? O fea o i ai le faakerisiano? O fea o i ai tu ma aga ia e malu ai Samoa? Leai. E le mafai ona tuua le aso 15 lea na faalala ai i fafo tupu, aemaise o tamalii, o e na tofofi mai lava e latou itumalo e fia omai iinei i le Maota lenei, o le latou valaauina, o Nofoa nei...

**FOFOGA FETALAI:** Ou te fesoasoani atu i le sui usufono. Ou te talitonu foi o lea ua maea ona tatou asaina lea vaega, ua uma foi ona avatu le tala a le Nofoa. E talitonu foi o tatou foi e faapena, e tatou te manatu tele i le tatou Maota o tatou o taitai o le atunuu, o lea ua maea ona faatea ia mea i atuvasa ua tuanai. O le taimi lenei, o lea tatou te folau i le vasa fou. O le mea lea, tasi ia ae foi atu le tanoa ma le saunoaga, o lea ua tuanai ia aso, o lea ua tatou i ai i le filemu ma le matagofie o Iesu Keriso ma le tatou mafutaga fiafia i totonu o le Palemene.

O le mea lea, ua uma ona fai tala a le Nofoa, ou te talitonu foi, ua tuanai ia taimi, tatou alo i luma o lo o faatalitali mai ai manuia o le Atua. Ia, toe tuu atu le avanoa o le sui usufono mamalu.

**Afioga SULAMANAIA FETAIAI TAUILILI TUIVASA:** Lau Afioga i le Fofoga Fetalai, e usitaia tele e le sui usufono lenei pe a e saunoa ma e malele, ae o le tuualalo, e aoga mea ua tutupu i le tuanai aua luma ma taeao.

E momoli le agaga faafetai i lau Afioga i le Minisita o Tupe. E le faigofie lou valaauina. Masalo foi o se taimi muamua lenei i faamaumauga a si o tatou atunuu ua faaloalo ai ma ua tofofi ai outou e taitaiina lo tatou sa e ala i lau Afioga i le Sao Faapito. O lea lava ua tofofi e le Atua le Atua i le Atuā. Ua uma le isi Atuā na taitaiina le foe o Samoa, o lea ua e tulai mai. Viia le Atua. Ae a lau Afioga i le Minisita o Tupe o le tamaitai? Ia viia le Atua.

A o se tuualalo a lenei Itumalo i le Tala Faatatau o le Tupe po o le Tala Autu, e tele lava o mea o lo o vaai atu i le Tala o le Tupe, faafetai o lea lava e sosolo i mea sa i ai le tatou faigamalo ua tuanai. E le aiaina e lou sui usufono ni mea fou ua tou faia, o lea ua ia te outou le taitaiga o le Malo. A o le agaga faafetai o lenei itumalo ua tali mai i manaoga sa avatu foi i Paeaiga ua tuanai e ala i le siitia o totogi o nai pulenuu, viia le Atua o lea ua maua mai faamaumauga, o lea o le a siitia totogi o pulenuu. Faafetai.

O lou popolega foi i le tulaga ou te le toe asa le taimi ua tuanai, aua ne i faamalieina le tou tulai mai i folafolaga sa faatino. O le popolega o le sui usufono o Vaimauga, ne i alu alu le sa paulia e ala i totogi o le aufaigaluega a le Malo ma latou. A maua lava totogi, pau lena o le mea e naunau i ai le sui usufono lenei. A o lau tuualalo i lena Itu, tautuana le aufaigaluega a le Malo. Ua vaai lava ma le faanoanoa i le popole o Ofisa Sili o Pulega o Matagaluega ma le aufaigaluega, se i tulou lava, faatetea lea, suspend lea,



terminate lea. O tatou na o le 5 tausaga le tatou valaauina, a o tupu ma tamalii e ua tuu i ai le faaao, tuu i ai le taitaiga o Matagaluega a le Malo, o le latou tautoga lea na ave ai i latou i fafo.

**FOFOGA FETALAI:** Ia, o le fautuaga lava i le sui usufono, ua faanoanoa lava le Nofoa i le faalogologo atu i le tulaga ua soona... e pei ona saunoa le Palemia i le taimi ua sola ma le... e leai e le o i ai se tulaga faapena. O lo o i ai lava mafuaaga ma tulaga aloaia. O se taimi foi saunoa, ae pei ua faalauaitele pea lau saunoaga, ia o le ala lena o lea e popole ai le Nofoa. Ua faafogafoga mai foi ma le popole le aufaigaluega faapea po o le a ni fuafuaga. Ae manatu tele, o tatou o taitai o le atunuu, tatou taofi iumaea ina ia tumau pea le mamalu o le Palemene ma le tulaga faapea aua lava le aufaigaluega a le Malo. O le mea lea, ia, malie ia le sui usufono o lea ua tea ia atuvasa, o lea foi ua tatou vaai i se mea e maua ai le filemu o le Palemene ma tatou uma.

Se i tulai mai le Taitai o le Itu Agai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, ina ne i te i ua avea lou tulai atu analeila e faapea ai e leai ni mea o tutupu, o la e i ai mea e tutupu. Ae o le toe agai o le sui usufono i le tulaga lea, o se tuualalo, o se tuualalo i le Malo ia faataua le tautua a le aufaigaluega a le Malo, aua e tua i ai le galuega fai, o latou o lo o i ai le tomai. O lau la lea faitau i le toe agai o le sui usufono o le sui usufono o lo o saunoa nei, o le faamanatu.

**FOFOGA FETALAI:** Faafetai. Malo, manaia le saunoaga a le Taitai o le Itu Agai. Ia, o le faamanatu ma le tuualalo. O lea foi e faafogafoga mai le Malo, e taua foi le tulaga lea ua saunoa i ai, ae e popoe lava i le soona faalauaitele, ia leaga o le tatou galuega tausoa faatasi aemaise o le mamalu o le Palemene aemaise foi o le va o le aufaigaluega ina ia faapena foi ona tumau pea le mamalu o tatou saunoaga i totonu o le Palemene.

Ia, e manatu le sui usufono o oe o se tasi o sui usufono matua, ia faaauau maia le...

Tulai maia se tasi o sui usufono mo Faleata Nu.3.

**Tofa Lealailepule Rimoni Aiafi (Faleata Nu.4):** Lau Afioga i le Fofoga Fetalai, faafetai lava i lau Afioga ua matagofie lava lenei aso i le tatou feiloaiga mai le amataga, pei ona e saunoa i le tulaga o le faamagaloma ma le tatou feiloaiga foi i le Aso Faraile.

*“Ia na pau lava lea na ona faamanatu i lau Afioga, na uma tatou faalelei ma tatou o atu foi tatou feiloai i lalo i le ta o le 2, ae ta le 4 tuli si tama o Tiatia. Ia na ona faamanatu atu i lau Afioga. Faafetai lava”.*

**FOFOGA FETALAI:** Ia, e popoe foi le manatu o le Nofoa i le tulaga lea ua e faailoa mai, ona e manatu foi e le o se mea e ono faailoa mai i le Maota le tulaga lea, o lea ua i ai lava alavaa ma alafua o lo o galue ai le Fofoga Fetalai ma tulaga o le Tulafono. O le mea lea, o lea ua maua, ma ua tapena foi manatu ma faamaumauga ma faamoemoe aua lava le agai i luma. E talitonu lava e le o se tulaga lena e ono faavevesi ai le tatou Palemene. O lea ua manatu o lea ua aumai tuualalo, o lea foi e faafogafoga ma le totoa le faigamalo.

Ia tulai mai lau Afioga i le Palemia.

**Afioga Hon Fiamē Naomi Mataafa:** Faafetai lava i lau Afioga mo le avanoa. Ona ua laga mai i le saunoaga a le sui usufono o lo o saunoa nei i se tulaga faalauaitele, faatetea, faamalolo, tutuli. Ou te taofi lau Afioga i le Fofoga Fetalai, ou te fiafia e fai i ai se talanoaga i le mataupu lena, ma ou te fia tali auiliili ia i latou ua faamalolo. Ma ou te manatu e aoga. A faapea e le i faafogaga muamua i ai le sui usufono o lo o saunoa, ia o lea o le a toe fai atu le tala.

O tagata na faamalolo, o le Loia Sili. O le mafuaaga ona o mea na tutupu i le va o tatou faapolokiki ma tatou agai i le Faamasinoga, ma aafia atu ai ma le sa Loia Sili, ua le toe i ai se tulaga e mafai ona matou galulue fetalitonuai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, e i ai le faaeteetega i i le tulaga lea. O lea ua taoto le mataupu...

**Afioga Hon Fiamē Naomi Mataafa:** Ma o le mafuaaga lena lau Afioga i le Fofoga Fetalai...

**FOFOGA FETALAI:** Onosai mai se i...

**Susuga Hon Tuilaepa Fatialofa Auelua Sailele Malielegaoi:** E matua faigata lava le mea lea.

**Afioga Hon Fiamē Naomi Mataafa:** Lau Afioga i le Fofoga Fetalai, o lea ou te tali atu i o, e leai se mea e tu mai ai fua ia i luga.

**Susuga Hon Tuilaepa Fatialofa Auelua Sailele Malielegaoi:** Afai o le a tatala le mataupu lea, ona tatou talanoa loa lea leaga e leaga le mea na fai.

**Afioga Hon Fiamē Naomi Mataafa:** Afai e lagalaga mai, o lea la o le a tali atu i le lagalaga mai.

**FOFOGA FETALAI:** E faamalulu atu... o lea e tau faaleaga ua laga e le sui usufono, o le ala lea o le tulai mai o le Afioga i le Palemia, ia se i tau faamanino.

**Susuga Hon Tuilaepa Fatialofa Auelua Sailele Malielegaoi:** O le mea lea ou te tu atu ai, onosai le Afioga i le Palemia...

**Afioga Hon Fiaame Naomi Mataafa:** Fai oe i au sui usufono e onosai pe a faapea o lea.

**FOFOGA FETALAI:** O le mea lea, o le itu lava lea o lea e faaeteete ai le Nofoa i le lagalaga o mataupu faapenei faalauaitete le sui usufono mamalu, ia e oo lava i ooooga ona outou le fia faafofoga lea i ai. O le mea lea, malilie ia lau Afioga i le Palemia faapea foi le Taitai o le Itu Agai, o lea lava ua tatou o i le fealofani ma le galulue faatasi. O a foi ni mea ua tuanai, o lea ua uma ona tatou talanoa, faatea mea ua tuanai tatou agaigai i luma aua le lumanai manuia o le atunuu aemaise o le tatou Maota ma ana galuega fai.

O le mea lea le sui usufono mamalu, o le agaga lena o lea sa avatu ai le tuualalo, ia alofa aua foi le soona faalauaiteteina a tatou saunoaga leaga o lo o faafogafoga le aufaigaluega aemaise o le mamalu o le atunuu. E i ai lava tulaga e le ono oo foi i ai a tatou saunoaga ma upu ma fetalaiga ma tofa. O le mea lea le sui usufono mamalu, tuu ese ia futia ae faaauau mai lau saunoaga mo lou itumalo.

**Susuga Hon Laauli Leuatea Polataivao Fosi:** Lau Afioga i le Fofoga Fetalai faamolemole lava....

**FOFOGA FETALAI:** Ia, se i tulai mai lava le Minisita o Faatoaga.

**Susuga Hon Laauli Leuatea Polataivao Fosi:** Ua ou toe tulai atu lava ona o le tulai mai o le sui usufono mo Faleata. E tuga le mea lea leaga o le faatonuga, o le faatonuga a lau Afioga. O lea foi sa taumafai atu le Palemia, a tatou o loa e talatala le mafuaaga ua lavevea ai le aufaigaluega a le Malo, o latou lea e taatia ai le mea lea.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, ua uma ona e saunoa, o lea ua ou malolo i lalo a o lea foi ua toe tulai mai ia le Minisita. Ou te tuualalo atu.

**Susuga Hon Laauli Leuatea Polataivao Fosi:** Malie o lea e le avatua se avanoa. O lea e aumai le avanoa e le Fofoga Fetalai. O le mea lena e avatu ai lau Afioga i le Fofoga Fetalai, aua le toe faamamasagia lau faaiuga ua fai. Na ala ona aafia le sui o le Ofisa o le Fono ma le Loia Sili, o outou.

**FOFOGA FETALAI:** Ia, tatou... tatou onosai. Ia, malie le Afioga i le Minisita.

**Susuga Hon Tuilaepa Fatialofa Auelua Sailele Malielegaoi:** O lea e onosaia, leaga e oona mea ia na fai, aemaise le sui usufono na faatoa tu atu nei.

**FOFOGA FETALAI:** Ou te manatu, ia onosai mai le tatou Maota. Ia, o lea foi ua maua le... E ui lava ina tuuina mai le faamatalaga a le sui usufono o Faleata lea, a o lea lava ou te mafaufau pea i ai i upu ia ua fai i totonu o le Maota, ona o au foi, e le faafaigofie ona fai sau faamatalaga i tulaga ia. Ae taatia mai o lea lava e mafaufau loloto i ai le Fofoga Fetalai. Ae ui i lea, ua...

Ia, lau Afioga i le sui usufono mamalu, a e alofa, aua ia e te toe oo i le aufaigaluega ma le tele o le pisa. Faaauau mai lau saunoaga toeitiiti lava uma lou taimi, o oe foi lea ua tuu atu i ai le tatalo faaiu o le tatou fonotaga. O le mea lea, aua e te toe oo i mea ia ma le tele o le pisa.

**Afioga SULAMANAIA FETAIAI TAUILILI TUIVASA:** Masalo e le i silafia foi e le Maota lenei si ou atalii lea na tagatavaleina. E manatua pea i lou loto fonotaga nei a le atunuu. E uma atu loa se fonotaga, ou te alu atu e sagisagi mai le atalii, “Dad, na pa se pomu.” Ou fai atu, “I, na pa le pomu.” Ua le toe pa la se pomu, a o le pomu atomika lea o le a pa.

Lau Afioga i le Fofoga Fetalai, e ala ona ou taua le mea lea, o lou manumanu ne i pefea si o tatou atunuu i ni sue. O le ala lea na toe naunau ai. A sue la e tagata ia e... o fea o le a aumai ai tupe a le Malo e totogi ai?

**Afioga Hon Fiamē Naomi Mataafa:** Lau Afioga i le Fofoga Fetalai, o le a tuu pea le sui usufono lea e fai o lea ua saunoa mai lona Taitai, o lea ua ou malie atu, ae fai lava?

**Afioga SULAMANAIA FETAIAI TAUILILI TUIVASA:** O lea e te le i faatagaina le Palemia.

**FOFOGA FETALAI:** Le sui usufono mamalu, faatali. Faapea lava au e te saunoa mai i se pomu o se pomu manaia lea na e faia mai. Ia na o le pomu foi e toe vevesi ai le mea. Se se i tau fai mai ni pomu manaia e faafogafoga i ai le Maota. Ia, ae saunoa foi lea faa-tagata matua, ma see ese loa ma lea tulaga, tatou o i se auala e filemu ai le tatou Fono o lea o le a maea le tatou galuega i lenei aso. Le sui usufono mamalu.

Lau Afioga i le Fofoga Fetalai, o le a oo atu i manaoga o lenei itumalo. I le tulai mai o lau Afioga Olo i le Minisita, ia, faafetai lava ua tali le Atua. Tautuana ifo auala galue o lenei itumalo e pei ona i ai e amata mai lava i

Laulii, Letogo, Vaialele ma Fagalii. E le gata i lea, o tulaga foi i le suavai o lenei itumalo. Mo le silafia o le nuu lenei po o le Vaimauga e faamanuiaina i le suavai. O nuu la ia o Vaialele ma Fagalii, o lo o inu i le mita lea e sau i gauta o Vaialele, o lea e faasopolia uma ai Samoa, ae leai lava se mea o penefiti ai lenei afioaga ma lenei itumalo i se faamamaaveaga a le Malo e faapea e faaafa se pili pe a.

O lea foi ua talosaga atu i lau Afioga i le Minisita i le vai, se i tautuana matou nuu ia o Laulii ma Letogo, o lo o inu lava i le vai palapala lea po o le vaitumaoti. A e saunoa mai o le a mafai ona faamita le matou vai ae tuuina mai i lalo o le puleaga a le Samoa Water Authority ina ia faamama ae i ai se faamamaavega mo matou pe afa le pili pe fai fua leaga o la e sau, ia, o le a ioe atu lenei afioaga.

Faafetai i lau Afioga i le Minisita o tulai mai, o le tele ia o auala foi a si o matou itumalo e pei ona i ai lenei afioaga foi ma lenei itumalo i totonu o le taulaga, o auala taloto i totonu o si ou nuu i Letogo ma Vaialele ma... e le o i ai lava se mea o faatinoina. Ou te tatalo atu pe mafai ona ta asiasi atu ma oo atu i lea vaega o si ou itumalo ina ia faaleleia auala taloto ia i totonu, ua tele le mamalu o le atunuu o lo o afifio i lea vaega o Vaialele po o Maugafiafia, ae le o lelei le auala taloto o lo o agai atu i ai.

Oo mai i le Afioga i le Minisita o le Samoa Land. Leatinuu, e pei lava ona ou fai atu o eleele o lenei itumalo ua leva ona finau ai, se i alofa mai ma toe tuutuu i lalo tau ia sa i ai, e pei lava ona tuuina atu i le faamamaavega lenei na tuuina atu i le \$8,000 ia pe aumai fua loa o matou eleele e pei ona i ai foi le tatou tuugatala.

O le isi o vaega o lo o i ai foi i le matou itumalo, e pei lava ona fai atu o le tele o fanua o lo o i ai i o, o fanua o lo o i lalo o le Samoa Land. Pe mafai ona toe silasila ane lau Afioga. Ua uma ona fuafuaina foi i Paeaiga ua tuanai ina ia tufatufaina i o matou itumalo i se tulaga o le lisi, a o le tulaga lenei se i toe silasila ane i ail au Afioga, ua fia omai le matou itumalo e totogi mai tupe, ae le o mafai ona faamatuu atu i tulaga tau lisi ma tulaga faapena. E tatalo atu foi i lau Afioga i le Minisita Leatinuu, aumai le tatou vaalele, aumai lenei auaunaga. O le manaia o le faigapaaga lenei, seiloga lava e lele i luga o le ea faatoa mafai ona totogi. Aumai lenei atinae aoga i si o tatou atunuu ua alu ai foi a tatou tupe. Ia a faapea o la e i lalo ai ma lau Matagaluega le tama lea o Olo i o i le malae vaalele i Fagalii, ia a faapea o lea ua matau atu pei ua faatuatuanai lava... ia tatala ifo Fagalii ina ia mafai ona toe... aua o la e ua vaai ua aveese loa le malae vaalele, ia la e ua avatu i ai le Ofisa o Leoleo. A o la e tele le fanua, pe le mafai ona toe silasila ane ina ia mafai ona toe tuuina mai le malae vaalele ina ia maua ai foi ni galuega ma ni tupe a si o matou nuu i Fagalii.

Oo atu i le Afioga i le Minisita o Falemai, e momoli le agaga faafetai i lau Afioga, o lea lava e toa Samoa, o lea ua lalata mai i Tutuila le faamai. O le tatalo lava a lenei itumalo, ia tapuni poea le border, ae tautuana a faapea ua

i Tutuila pei ona saunoa foi le sui usufono o Aleipata, ia pe mafai ona alu atu se tatou petolo i vaa foi ia pe a ua leai se tatou vaa... e faapena, leaga o nuu ia i le va o Aleipata ma Tutuila, ia e mafai lava ona sopo mai i vaafagota. E mafai ona foia ai lava le oo mai o le faamai i si o tatou atunuu. Ae momoli le agaga faafetai i nei aso e lua o le a faamalolo ai ae faatino lea auauunaga.

Oo atu i le Minisita lea o... le tama lea o Toelupe. Ia faaaoga le atamai na ave ai oe i atunuu i fafo. O le initaneti ma le fesootaiga lea mai fafo, ua le mafai le mea o le taufaaleaga i luga o upega tafailagi, ona atonu e le o i ai se mea e vaimama ai, ua tele le sau i totonu ae leai se mea o mafai ona control ai lea vaega ma maua ai e o faaaoga sese ai lea auauunaga. Se i silasila ane i ai lau Afioga i le Minisita.

Lua, ia na o le SamoaTel lava ma le Digicel lea e faatinoina lea auauunaga. O le a le mea e le tatala ai ina ia tele nisi kamupani e omai i totonu ia faataugofie ai lea auauunaga i totonu o si o tatou atunuu. E pei o le agaga lena o lou sui usufono o le tele o taimi nei sa... ae pei ua slow le mea talu ona e tulai atu, a o le tausaga ua tuanai sa vave i le taimi o Afamasaga, a o lea pei ua e tulai atu ua tau slow laitiiti lava le mea. Ae se i silasila ane i si ou nuu lea o Laulii, e le ola lava le TV. Ia pe mafai ona fai se pou i le va lea o le mauga o Letogo ma Laulii ina ia oo atu ai foi le TV i si afioaga lea o Laulii aua e tele ina mauga.

Toe oo mai i le Afioga i le Palemia, e silafia foi le tausaga ma le Paeaiga ua tuanai, lea sa approve ai le taligalu o si ou itumalo aemaise le nuu lea o Laulii. E pei lava o maua ma Leaana lea sa... Ia, o le tatalo ona o lea e i lalo o lau Afioga le taligalu ia, e ui lava i le aafia o si ou itumalo i Fagalii, Vaialele, Letogo aua o nuu nei e tulata i le sami, a o le nuu lava lea o Laulii e matautia ona e leai se aau, e fafati lava galu i tuamaota. Ae a sosola atu foi i uta, e alu atu ae pa mai le vai ona o le tele o vaitafe. Ia se i faaauau ifo le taligalu lea o si ou itumalo. Ona o lea e vaai atu pei o lea o le a ave le faamuamua ia Manono ma Apolima, a o nuu talafatai o le tatou taulaga i Apia i o matou taligalu.

Oo mai i le Minisita mo Tina ma Tamaitai, faamalo i lou tulai mai.

O le tulaga ua i ai le vaai atu i le Tala o le Tupe, e tele mea o tupe ia pei ona ou fai atu, faafetai o lea ua tali i lau talosaga foi ua tuanai i le Paeaiga na i ai, i le totogi o nai pulenuu. Faafetai o lea ua siitia totogi o nai pulenuu ae o le tulaga i mea ia o tupe ia ua tuu i faalapotopotoga foi nae, e i ai lou manatu, sa tatau lava ona ala mai pea i totonu o le Matagaluega o Tina ma Tamaitai tupe foi nei o lea e ave i tua i faalapotopotoga na e pei o le Victim Support. O mea uma lava e tatau ona ala mai totonu o le Matagaluega o Tina, ona toe tufatufa atu lea. Ua ta vaai foi i le aotelega o le Tala o le Tupe faapena foi isi vaegatupe ia e ave i tua i faalapotopotoga a o le mea e fai ai le tino puta. O le a le mea e le control atu ai pea e le Matagaluega o le Falemai, ae pei o lea e sau lava alu sao i vaega na. E i ai le manatu faapena e manaia ae

tasi lava le faitotoa e ui uma atu ai i totonu ona toe tufatufa atu lea i nisi o vaega.

Faafetai lava i le Minisita o Faatoaga. O le tele o sui usufono lea sa sausaunoa ai foi i le authority o le a fai. O le tele foi o le tatou tupe o le a fai ai foi se na vaega lelei. Ae pei o le manatu o le sui usufono ia o le a faatino foi lona auaunaga e le tatou Malo, o la e ua i ai nai faatoaga, o nai faifaatoaga ma i latou i tua atu, ae o le a toe involve loa foi la le Malo. Ae pei lava ua le mafai, o lona lava e i ai nai faifaatoaga ma i latou o lo o faatinoina lona auaunaga i le tuuina atu o oloa a si o tatou atunuu i fafo e faatau ai, ona o la e i ai le tatou fale i Aukilani lea sa run e le STEC. Pe mafai ona tuu pea lona vaega i tua i le mamalu o le afaifaatoaga o lo o faatinoina le tuuina atu i fafo o ia vaega.

Ia, oo atu i le Minisita o Leoleo. O le tatalo lava i le Afioga i le Minisita, faafetai ua e tulai mai. O le tulaga ua i ai si o tatou atunuu, ia lea lava ua e oo foi ua e taitaiina le Matagaluega sa vaai foi ma sa Komesina ai lou tama. [.....]. Ia se i silasila ane i lona vaega. O la e o lava malu o le mal oi au faatoaga ma mea e fai...

**Susuga Hon Laauli Leuatea Polataivao Fosi:** Lau Afioga i le Fofoga Fetalai...

**Afioga SULAMANAIA FETAIAI TAUILIILI TUIVASA:** Ae se i silasila i taitai o le atunuu e faapena le avafatafata...

**FOFOGA FETALAI:** E faamalie atu i le sui usufono se i tulai mai le Minisita o Faatoaga ma Faigafaiva.

**Susuga Hon Laauli Leuatea Polataivao Fosi:** Ioe, se e ava tele i faamaumauga a le tatou Maota. O le upu lea faapea o le faiga o taitai o le Malo e pei o le faiga o ni pagota. Faataaiaese upu ia e tuga upu ia ma le faafofoga a le atunuu, e tauvaleina ai le Minisita ma le Matagaluega. E le o le agaga lea sa tupu i le aso lea, o lea sa tulai leoleo ma le Matagaluega e pui-pui le saogalemu i mea na fai. E avatu lau tuualalo faamolemole, e aveese upu ia e le o le mea lea na fai e leoleo.

**FOFOGA FETALAI:** Faafetai.

**Susuga Hon Tuilaepa Fatialofa Auelua Sailele Malielegaoi:** Lau Afioga i le Fofoga Fetalai, se ua ou le malamalama po o le a le mea e tutu soo mai ai le Minisita o Faatoaga, o la e i ai le Minisita o Leoleo. O le mea lea ua ala ai tele le Minisita lea.

**FOFOGA FETALAI:** Ia, e faamalulu atu i le tatou Maota. Ou te talitonu o fetalaiiga lava aua le mamalu o le Maota. Ou te talitonu foi e leai, e ao lava foi ona puipui upu ia ua tautino i luma o le Maota, ona ou te faasaoa le saunoaga a le Minisita, ona o upu ia ua ... e le lelei. O le mea lea e poloaiina upu ia ina ia aveesea. Ma le tatalo lava i le sui usufono, ia o lea ua toetiiti lava uma lou taimi, ae malie ia. E manatu lava i le tatou va faafeagai ai ina ia tausi pea le mamalu o le tatou Palemene faapea foi saunoaga.

Ia tulai maia e faauma le saunoaga.

Upu na faatonuina e le Fofoga Fetalai e aveese mai faamaumauga o le saunoaga a le sui usufono mo Vaimauga Nu.1: “[*Ia ae talu ona e tulai mai, o le faiga o leoleo lea ua i ai o taitai o le atunuu pei o le faiga o pagota.*]”

**Afioga SULAMANAIA FETAIAI TAUILILI TUIVASA:** E tele lava le tapenaga i lau Afioga, ae pei o le tele o faauilavea lea ua... ae a fuafua i le tele o taimi o lenei itumalo o lea lava ou te mataua e le i taitai lava, ae usitaia pea lau Afioga. E pei lava ona ou fai atu o lea e le i oo le talanoa a lenei itumalo i le tupe, ona o lea sa tau avatu ni manatu aua le itumalo.

Ona faapea lea o so matou manatu, ia, e ui i le tele o le naunau sa naunau ai e fia tuuina atu, ae ava tele i lau Afioga ma le taitaiga o le tatou Maota lenei. E ui foi i le tele o isi mea sa fia taua i le mea lea o le tulaga i le toe aumaiga i totonu o nisi foi vaega e faatino ai nisi o auaunaga pei o le Law Reform aemaise foi o nisi e suea tatou tusi, ae leai. O lenei lava itumalo e tumu i le faaaloalo, pau lava lea o le tuualalo atu i le Afioga i le Minisita o Tupe. O oe o le fatu lea o si o tatou atunuu. E matau lava i le aotelega o le Tala o le Tupe, faafetai o lea e sosolo lava i mea sa i ai. Na o nai vaega lava o lo o faaopoopo ma faaopoopo nisi tulaga. A o le tatalo a lenei itumalo, tautuana le afaigaluega a le Malo i totogi, aua ne i faamalieina ona o ni folafolaga sa tatou folafola i le atunuu, ae o le mea sili lava, ia malu pea ma maua totogi o le afaigaluega a le Malo.

O le Minista o Tiute. E momoli le agaga faafetai ona o le Matagaluega lea, masalo o le 90% o le Tala o le Tupe o lo o faatino ai le tatou atunuu o lo o aumai i le Matagaluega lea o Tupe Maua ma le Tiute lea ua tulai mai lau Afioga i le Minisita. Ia o ou mama na, tele o nai mea o lo o i ai aemaise foi le inaina foi o le atunuu i le tulaga lea i le mea lea o le TIMS po o le a le tulaga o i ai, ia se i toe silasila ane i na vaega ina ia faaleleia ma faapena ona faafoia ai le tele o faafitauli.

Ia ona o le usitaia o lenei itumalo o lau poloaiga, ona ou faapea lea, ia masalo ona o lea ua latalata mai le taimi, ia masalo o nisi o vaega o le a faauma taeao. Ia ae ona e tele ia mea e le i oo ai lenei itumalo lau Afioga ia



ona o lea e matau atu e le i oo foi i le Faamasinoga, ia ona o le tele o faauilavea, toetiiti lava uma Minisita ona faauilavea i le lauga a lenei itumalo, ae sa i ai lava le manatu, ia ona faapea lea o se manatu, ia o le a se finagalo? Ia o le a ou faia ia se tatalo ona o lea ua e tofia au ou te tatalo, ia ona toe faauma ai lea o manaoga o lenei itumalo i lau Afioga o oe o le Papalii.

Faafetai ua e taitaiina le Maota, o lau Afioga foi o le Loia ia e te malamalama uma i Tulafono. Ia o se tala lena a le itumalo lenei o Vaimauga. Ia a e finagalo o le a fai se tatalo, ia ae faauma taeao nisi mea o lea sa ou fia talanoa i ai.

**FOFOGA FETALAI:** Malo lava, faafetai lava saunoa i le sui usufono mamalu. E pei lava ona ou talanoa atu o oe le isi sui usufono sinia o le Maota. E talitonu foi e te tofamamao ma e silasila mamao, ia aua lava le manuia ma le filemu o le Maota. O le mea lea ina ne i tuuaina foi e le sui usufono mamalu ia le Nofoa faapea ua taofi atu ia le saunoaga, e leai o lea lava e i ai ia faamaumauga i i, ua 37 minute o le ta lauga.

O le mea lea, ia malie ia, o lea ua tea mai le tele o fautuaga, o lea foi ua faafofoga mai ma le totoa ia le Faigamalo, ia talitonu lava e le vale se tali o le saunoaga pau. Ia e talitonu foi, o lo o i ai foi ia tatou taimi pe a auiliili ia le tatou... ia e toe maua ai foi se isi ou avanoa tai 15 minute. O le mea lea le sui usufono mamalu, ua faamalo le saunoa. Faafetai foi mo lenei aso ma le saunoaga, ae talu ai, o lea ua matau atu ua lalata i le tatou taimi malolo.

Ia tatou tala soifua ia i le alofa o le Atua mo le aso a taeao ona toe faaauau ai lea o nisi mataupu aua lava saunoaga a nisi o sui usufono o totoe o le tatou Maota. Ae o lenei avanoa, e momoli atu lava le faafetai ma le faamalo i le maualuga o le Maota, i le Afio o lau Afioga i le Palemia, lau Afioga i le Sui Palemia, Afifio foi Minisita o le Kapeneta faapea Minisita Lagolago.

Ia faafetai foi i lea Itu o le Maota, i le Afio o lau Afioga i le Taitai o le Itu Agai ma le mamalu o sui usufono o le Palemene. Faamalo le usufono faamalo foi le onosai. E le faigofie le galuega o lo o fitaituga i ai le Maota, peitai o lo o maua pea ia le tou onosai ona o le manatu i le valaauina ma le tapuaiga a Samoa. Malo faafetai.

E momoli foi le faamalo ma le faafetai i sui usufono sa sausaunoa i lenei aso, malo tapena malo foi saunoa. Faamalo le manatu i tapuaiga a itumalo, o lo o tatalo ma tapuaia outou faiva.

E fia afea foi i se faafetai le tapuaiga a le Ao Mamalu o Le Malo ma le Masiofo, Sui o le Fono a Sui Tofia, faapea foi le Faamasino Sili ma le mamalu o le Faamasinoga. Ia ae a ia Faauluuluga uma o Ekalesia Kerisiano uma i Samoa ia ma le aufaigaluega faauuina o le Talalelei.

Tapuaiga a Aiga ma Tama, Tama ma Aiga, le Usoga a Tumua ma Pule, Ituuu ma Alataua, Aiga i le Tai ma le Vaa o Fonoti, faamalo faafetai i la outou tapuaiga. Ua tau i manuia le Fonotaga a lau Palemene i lenei aso, ona

o le mana o lau tatalo ma lau tapuaiga. O le a foi se gagana ua sala a lau Palemene, ia alofagia ma faamagalo mai. Ia o se avanoa foi e faapai atu ai i le mamalu o le Palemene, afai ua sala se gagana a le Nofoa i le faafoeina o lenei aso, ia foi maia i le tagata se vaivai. Tatou tau fai tatalo i le alofa o le Atua, ia momoli atu le soifua ma le ola i le aso a taeao, toe faaauau ai ia le tatou galuega.

Le auaunaga faifaipea a le Malu o le Malo, Pulega o Tineimu ma Faalavelave Tutupu Faafuasei, le 2AP, Matagaluega o le Soifua Maloloina, ma le Koluse Mumu, faamalo faafetai i la outou tautua faaauau mo la outou Palemene. Faamanuia le Atua i lo outou valaauina. O le a se mea ua lelei ona o tatou faia, ia fai lea ma Viiga o le Atua.

Ae tatou te le i tolopo, ou te talosaga atu i lau Afioga i le sui usufono mo Vaimauga Nu.1. e te saunia se tatalo e faai ai le tatou Fono.

***Na tolopo Galuega a le Fono Aoaofaitulafono i le itula e 6:01 i le afiafi seia aulia le itula e 9:30 i le taeao o le Aso Lua, 21 Setema 2021.***